

東
華
續
錄

東華續錄

同治二十二

臣王先謙敬編

臣張式恭恭校

五月丙午朔諭內閣昨因御史奎齡承繼瑞亨引見科缺未到面
諭議政王軍機大臣查明該御史等不到次數據實具奏茲據奏
查據吏部文稱御史奎齡引見科缺四次承繼引見科缺六次均
止此次告假未到瑞亨引見科缺八次共計四次告假未到等語
京畿道御史遇有京察年分向來均得保列一等瑞亨調任京畿
道後引見科缺四次未到其爲意存趨避顯而易見此等取巧之
風斷不可長瑞亨著撤去京畿道以各道御史調補用示薄懲其
所遺京畿道一缺著都察院堂官揀員請補奎齡承繼均係初次
未到姑從寬免其置議向來都察院章程因京畿道及巡視西北

兩城御史差務較繁京察保列一等以致捷徑爭趨反以升轉爲迂途陋習相沿殊屬非是嗣後都察院堂官務當認真察覈所有京畿道及巡視西北兩城科道如果才品兼優勤能稱職仍准照舊保薦其不勝繁劇者卽當隨時奏撤毋得以揀補在前稍存回護至各科道中有品行端方才具開展者亦當列爲上考不必拘定成案致令向隅也至漢員保送御史例須考試滿員則向不與考殊非愼簡言官之道以後保送滿洲御史著卽由各衙門堂官認真考試擇其通曉清漢文字品行端謹者出具切實考語保送候簡以期臺諫得人力除積習○諭議政王軍機大臣等閭敬銘奏瀝陳東省兵勇民團積弊請暫畱格林沁駐紮以安反側而靖人心一摺另片奏恆齡蘇克金兩軍實爲直東一帶必不可少之勁旅等語所奏自係實情惟皖北髮逆方熾張落刑餘黨未盡

殲除加以苗練據邑戕官蔓延句結曾國藩大有應接不暇之勢
且李續宜抱病北來日久尙未抵皖唐訓方兵餉兩絀止能固守
臨淮曾國藩見雖檄調成大吉等馳援壽州能否解圍尙難豫定
卽或南路攻剿得手又恐該逆乘虛由蒙亳一帶北竄以見在賊
勢而論南北均形喫重亟應緩急兼權僧格林沁惟當仍遵前旨
先將淄城攻拔剪除巨憝再行赴皖期與楚師南北兜剿共圖苗
逆庶不至有後顧之憂而又不可曠日持久爲淄川一城牽掣兵
力以致顧此失彼閭敬銘平日頗能實心任事見在旣膺重寄責
無旁貸亟宜振刷精神揀任賢能之員將該省兵勇團練諸積弊
次第整頓俾軍務吏治日有起色方爲不負委任劉長佑有督辦
三省剿賊之責所有直東毗連州縣各股匪該督當不分畛域督
飭員弁越境會剿其孤山屯聚教匪據閭敬銘片奏總兵黃國瑞

督軍進剿獲勝卽著閻敬銘速飭該總兵乘勝進擣賊巢肅清餘孽另股匪首張廣德被剿窮蹙率眾乞降旣據奏稱准其暫畱保德軍營以觀後效仍著該署撫畱心密察如果稍萌異志卽行拏辦楊朋嶺程順書自就撫以來能否真心反正並著劉長佑嚴密偵察毋貽後患本日據王拯奏降賊宋憬詩於昌邑莘縣臨清聊城四州縣村莊豎伊旗號勒取麥石心甚狡而謀甚大請密飭劉長佑計調來營及早誅戮等語宋憬詩自陝逃歸沿途騷擾近復招集黨與專與團練爲仇其心本屬叵測若不早圖必爲直東巨患著僧格林沁劉長佑閻敬銘體察情形妥籌辦理原摺著鈔給閱看又據御史富稼奏風聞直隸大城縣有總保長名目包辦合邑差徭從中侵肥欺索請飭詳查懲辦等語著劉長佑逐一查察如各州縣實有前項情弊速行裁汰並將該地方官嚴參懲辦原

摺著鈔給劉長佑閱看將此由六百里各諭令知之○諭東省兵勇率皆招募烏合並無得力之軍而降眾叛卒雜出其中通賊擾民挾制官長實爲心腹之患民間藉團嘯聚率眾抗官者所在林立此等情形久爲朝廷所深悉惟因苗逆猖獗不得不移緩就急屢諭僧格林沁督兵南下冀得及早蕺事第東省情形如此劉長佑雖久在行間而甫經到任或民望未孚閭敬銘本不知兵設親王南征直東匪勢復張不無後顧之憂且所統馬隊冒暑南行於天時地利均不相宜實爲兵家所忌因諭知親王俟淄川克後再行南下惟苗逆盤踞長淮唐訓方督兵進剿前已獲勝並將髮捻大股擊退於剿辦極有把握仍著督飭將弁隨時相機攻剿毋稍鬆勁會國藩已調蔣凝學等軍會援壽州共討苗逆並著嚴飭各軍合力會攻不可專待僧格林沁之軍致有貽誤吳棠調派陳俊

家等礮船五十隻馳赴臨淮五河是湖防已臻周密宿州一帶仍著飭令姚廣武隨時偵探嚴密防範其太和潁上均與豫省毗連張之萬身任疆寄責無旁貸務當抽調重兵妥爲扼截並著曾國藩唐訓方設法攔堵毋令苗逆西竄豫省得力之將甚少恐不足以禦巨寇也李續宜爲苗逆所畏服該前撫見雖患病但能鎮撫調度即可制其驕悍之氣疊次諭知曾國藩催令赴皖卽著兼程前進會商剿辦苗逆以副委任閻敬銘原摺均著鈔給閱看吳棠另片奏總兵黃國瑞孤山剿匪獲勝等語東省教匪恃險負隅必當埽其巢穴小勝未可深恃著吳棠飭令該總兵會同兗軍迅速進攻以期及早肅清用靖地方將此由六百里各諭令知之○諭多隆阿奏鳳翔危急請派馬德昭馳救並分路進剿情形一摺鳳翔被圍九月情形萬分危急儻不亟圖援應孤城困守勢難久持

多隆阿見已移營倉頭在渭河搭造浮橋分兵兩路進剿一由高陵節節掃蕩一由臨潼直搗沙窩老巢兼顧西安根本重地該大臣布置計已妥協省防即可微鬆著多隆阿星速進兵掃清悍黨將西安城外防剿各事宜妥籌兼顧城內見存兵勇爲數已不爲單卽責成穆騰阿瑛榮督飭弁兵實力籌防不得稍形弛懈多隆阿旣稱省城可以兼顧瑛榮卽可無兵單之慮所有馬德昭一軍著多隆阿瑛榮令其湊足三千人之數馳救鳳翔力解城圍俟解圍後仍遵疊次諭旨馳赴慶陽與熙麟籌商進剿迅解平涼之圍馬德昭未到以前著熙麟就見有兵力相機剿辦毋稍疏虞瑛榮亦不准再請攀畱馬德昭之軍致令株守貽誤將此由六百里各諭令知之○戊申諭議政王軍機大臣等袁甲三奏遵籌團練備禦及豫省兵力不敷防剿見聞蒙城危急等摺片並袁保恆奏遵

旨畱陳幫辦團練懇請免赴軍營一摺袁甲三以接奉前諭因苗逆猝叛陳州切近皖疆飭令號召鄉團速爲備禦並以袁保恆應遵前旨畱陳郡幫同辦理自陳病體支離見將團練辦法飭令伊子袁保恆會同地方官紳實力整頓惟豫省兵力不敷分撥近因余際昌戰沒張曜等亦調赴南路不能派往太和東路空虛苗沛霖占踞潁上正陽以後分圍蒙壽若令得逞勢必分路以窺汝宋而陳州均當其衝請調東三省馬隊助剿並稱見在蒙城爲苗逆圍攻甚緊請令僧格林沁倍道往援等語僧格林沁疊經諭令反旆南征該大臣以目擊直東見在情形北路之患有更緊切於南方者昨經閣敬銘奏懇畱僧格林沁暫緩南征所見亦同當經諭令速將潯川攻拔剪除巨憝再行赴皖該大臣全局在胃諒不至爲潯川一邑久滯南征第潯城攻克尙未有期直東羣匪辦理情

形亦尙未布置周妥難卽督軍赴皖苗逆鴟張本爲巨患唐訓方
惟有懷遵前旨拊循激勵各路兵團督令蒙城壽州文武竭力戰
守毋稍疏虞豫省東路歸陳一帶仍著袁甲三與張之萬等妥籌
防剿張之萬前奏參將張士元所部馬勇歸袁保恆統帶赴陳其
應如何布置情形仍著袁甲三妥籌辦理豫省兵力本不爲厚將
材尤乏金國琛一員節經諭令官文等飭令卽速赴豫差遣仍著
督催前往由張之萬酌量委任其李續燾之軍業經豫省遣撤回
楚著官文等於該員行經鄂省酌度情形如可畱爲鄂省之用卽
著另撥一軍赴豫派得力之員統帶以資調遣吉林黑龍江官軍
調發過多勢難再行檄調並著官文嚴樹森於鄂省馬隊酌調若
干赴豫俾利馳逐昨據巴揚阿奏荊州旗營見存馬八百餘匹均
尙臚壯鄂省馬隊尙有舒保等軍足資分布如荊營馬軍可以撥

調豫省亦爲徑捷卽著官文等酌量調派一面奏聞張之萬與袁甲三毛昶熙均當各就豫省兵團力籌戰守不得專待僧格林沁南征及他省撥兵致滋貽誤僧格林沁仍當將直東大局趕緊籌辦一有就緒卽行恪遵前旨返旆而南毋爲淄城一處久稽時日以致苗逆勢愈滋蔓至已降之眾及南歸之匪均有勾結之意而僧格林沁勢難卽行南下袁甲三張之萬毛昶熙唐訓方當迅速設法分別安撫截剿不可任其自然致增賊餒袁甲三片著鈔給僧格林沁唐訓方張之萬閱看袁保恆見在陳州幫辦防剿一時暫緩前赴軍營嗣後陳郡防剿事勢漸紓各路如有應行調遣之處亦應力圖報效正不得拘守常例以不忍奪情及侍疾等詞遂忘臣子墨經從戎之義也將此由六百里各諭令知之○己酉唐訓方奏據馬新貽稟圍蒙之賊自四月初二日被挫屢挑不動初

六日潁州府知府英翰督同參將程文炳等率隊薄之城上復用炸礮對轟斃賊無算賊堅閉不出英翰乃選死士連夜襲繞賊營詎賊目苗添罄另分馬步千餘潛至城南之丹鳳集襲踞穆家圩煽誘附近諸寨以冀斷我運道十一日程文炳督隊往剿苗添罄聞風潰逃我軍追殺數百名立將該圩平毀復乘勝攻破張蔡兩圩陣斬圩首張心田等是日城外之賊突於我營背後築壘英翰親率勇練毀其新壘而還十四日李城餘黨自山東竄回宿境英翰恐其併歸苗逆次日馳至韓村遣人分投招撫悉數投誠當收擒目李青選李增喜劉應發劉金鼎等所帶馬隊隨營效力餘散歸農英翰於十七日仍回蒙城又據署壽州知州毛維翼稟稱壽州被圍日久該逆覘知城內兵單糧缺防範稍疏四月初八日夜毛維翼挑選壯士縋城而出破其三營並將潰逃之賊追戮殆盡

二十一日毛維翼傳諭壽南團練分紮李九岡九里溝等處逆眾乘我營壘未定前來圍撲均經擊退是日道員蔣凝學一軍已至城南之十八里地方毛有銘一軍亦自六安繼進援兵悉集壽城當可無虞至懷遠之賊自經初九日之敗增壘堅守二十二日總兵張得勝等故縱難民刈麥賊壘每出數十騎逐之我軍佯爲不顧賊膽頗驕二十四日賊出一二千人陣於黑窯意欲誘我張得勝普承堯朱淮森等嚴陣以待另選輕騎鈔入麥田遇伏佯卻賊果悉銳逐之我軍分路進攻水師兩岸夾擊轟沈賊船數十隻逼近懷城賊眾殊死抗拒諸軍鼓勇繼進賊遂疾遁入壘仍以大礮憑牆抵拒是日之戰計共斃賊七八千人臣查苗逆盡抽死黨赴懷原欲乘我飢憊長驅而下蒙壽幸軍士用命力挫逆餒見在湘軍抵壽該城想可保全蒙城多新撫之眾又各圩大半苗黨日盼

僧格林沁來援若能早到蒙城或可固守揆度賊情見尙不至南
犯鄂疆北竄豫境惟臨淮水軍單弱該逆擄船甚多誠恐被勦勢
急順流下竄臣已咨調清江戈船助勦俟其來臨仍當督率兵練
進規懷城以期力保東路署壽州知州已革知州毛維翼前在蘇
家埠擅殺逃犯張汶典有革職拏問一案合無仰懇 天恩免其
查辦開復原官翎頂並加運同銜至副將張起鳳等臨陣捐軀併
請飭部從優議卹據駐防廬州總兵石清吉稟稱二十二日鮑超
蕭慶衍兩軍將巢縣城池克復其一切情形應由曾國藩詳細具
奏又奏續據馬新貽稟報英翰折回蒙城後連日某營進勦突有
韓村奸民勾引苗黨李化東孫夢卜等馬步千餘人啟門入寨英
翰帶隊往勦小有斬擒詎自山東逃回馬賊千餘又被苗逆勾結
歸併韓村寨內該逆麇集益多勦辦更爲棘手日內接僧格林沁

來札尙無啟程日期等語臣愚以爲馬隊利於野戰難於攻城與其以剽悍之鐵騎羈於淄川莫如趁此蒙城尙存僧格林沁剋日督師南下可以擣穴擒渠不然蒙城一失則潁亳蒙宿各圩勢必盡併於苗又輔以張總愚程三老砍及李城等股捻匪恐占地日寬蔓延日廣彼時僧格林沁卽返旆南征亦必難於收拾臣已飛飭馬新貽堅守待援並飭地方官購備糧草專待僧格林沁軍到妥爲支應相應仰懇 天恩飭下僧格林沁迅速由蒙進剿以維大局張之萬毛昶熙奏自總兵余際昌戰歿後賊踞正陽縣屬之方家寨萬安店等處與張岡賊勢聯絡蔓延及寒凍距汝甯僅六十餘里正陽息縣各寨請撥援兵臣等會商張岡之圍斷不可撤飭總兵趙鴻舉等嚴紮固守派王文行帶勇七百人先救賊攻各寨孫之友帶領馬步各隊截擊張岡外援四月十一日逆匪攻撲正

陽縣屬之吳家寨甚急次日王文行一軍趕到斃匪不計其數該匪逃入萬安店寨十三日王文行率勇追剿該逆列隊出拒我軍一面迎擊一面繞出賊後奮呼登陴匪勢不支四出逃竄我軍驅殺甚多十四日追至汝陽縣屬之熊寨北面賊匪迎前直撲我軍佯作撤退誘賊追至濠邊各勇奮力反攻該逆自相踐踏死者枕藉王文行帶隊窮追賊匪竄撲張岡忠心廟一帶孫之友帶隊追壓復敗賊於段家圩地方十五日探聞張岡踞匪有約援賊入寨之信檢討吳元炳總兵趙鴻舉等以賊情詭譎恐其誘我出隊乘隙撲營遂令李承先等分路紮住援賊果蠶擁而來趙鴻舉督飭各軍齊進殺斃賊匪無數牆內踞匪突出七八百人攻我後路經我軍礮斃百餘人餘俱擊退回寨十六七等日賊復從北繞至又經我軍擊敗該逆既不得併歸張岡意在偷渡汝河由新蔡遁回

皖境而汝南埠兩岸賊蹤徧滿臣張之萬於總兵張曜到汝後商令迅速追剿該總兵於二十二日馳抵宋寨適捻股由汝南埠直撲該寨立飭保英等率領馬步兩路衝壓該匪驚潰乘勢追斬騎馬悍賊數十名賊由李莊橋過河排列北岸是夜該總兵派隊渡河襲擊立斬賊首二十餘級賊眾大亂乘夜向東北竄去其分踞汝南埠之賊經孫之友等各率馬步隊由埠西衝入砍殺賊匪數十名餘匪爭渡我軍伏礮齊發又斃賊數百名是日竄至新蔡縣屬之平信鋪賊匪復經參將尹嘉賓知縣唐咸仰督練夾擊斃匪三四百名生擒捻首徐卯等正法餘匪遁回皖境臣等見令孫之友等掃除汝南餘孽一面令張曜回剿張岡分剿阜陽一帶踞匪然後進紮太和以援潁郡並擬派永綏五營馳紮固始以防苗逆俟張岡圍師紮定再將臨勝營撥歸袁保恆專防陳郡斷不敢專

顧一隅貽誤全局 上諭議政王軍機大臣等僧格林沁目擊直

東巨患未清不能卽行督軍回皖非但爲圍攻淄川一城而淄城見已合圍其勢亦難遽撤疊經寄知該大臣督撫等諭令僧格林沁之軍速將淄城攻克直東全局辦有就緒再行返旆而南此時皖省髮捻交乘及苗逆鴟張唐訓方務當督飭各軍固守蒙壽力圖懷遠與曾國藩所部皖北諸軍聯絡策應勉力堵挂壽州固守危城猶能出擊並令團練分壁城外攻破賊營見在湘軍蔣凝學與毛有銘兩軍赴援繼至壽城當可無虞蒙城被圍較緊潁州守英翰等亦尙能出戰襲奪賊之營壘攻破賊踞穆家圩及張蔡兩圩懷遠踞賊經官軍苦戰大加懲創唐訓方激勵將卒均能爭先用命力挫兇謀仍著督率各軍齊集團練進規懷遠以力保東路臨淮水軍單薄速將所調清江戈船催提前來以厚兵力而資備

禦山東遁回宿捻既經英翰招撫蒙城之南一帶亦因張蔡等圩攻克不敢復有顯然從逆其附苗之韓村及併入韓村之李城餘黨仍著相機剿撫兼施毋任苗逆肆行句合以孤賊勢據唐訓方奏鮑超蕭慶衍兩軍業已攻克巢城是皖北逆匪之勢少衰巢縣與蒙城相距非遙見在蒙城被困力難久支僧格林沁之軍急切不能赴援著曾國藩酌度情形飭令鮑超等軍於懷蒙等處擇其何地尤爲緊要相機策應曾國藩與唐訓方於皖省軍情均責無旁貸惟有通籌竭力辦理山東臬司丁寶楨一軍自湘新募成軍赴東計已在途如應移調赴皖卽著於該員行經豫省時截畱由豫東汝潁一路徑趨皖北以資調遣曾國藩唐訓方與張之萬等咨會辦理僧格林沁所派之施紹恆等隊計當到皖著唐訓方卽飭赴援蒙城當可得力張之萬所奏截擊張岡外援之賊並救應

正陽息縣各民寨尙爲得手著卽與張曜飭令吳元炳趙鴻舉等與王文行各軍將張岡賊巢攻拔掃除汝南埠等餘孽其由沈邱新蔡追擊出境之捻股並著督飭保英尹嘉賓等馬步越境追剿太和固始一帶均與蒙穎毗連張之萬等尤當飭令防剿各軍與皖省之兵聯絡聲勢相爲接應方寨黃寨及大小張寨攻克戕害余際昌之賊張振全業經擒戮出力官紳人等准張之萬等擇尤保奏將此由六百里各諭令知之○予安徽陣亡副將張起鳳祭葬世職○庚戌諭議政王軍機大臣等劉長佑奏東直交界肅清擬仿南省營制選練兵勇並請飭崇厚籌畫兵餉及吳再升到營派令募勇訓練各摺片東竄餘匪經官軍接殺幾盡直東沿河一帶已無賊蹤自應及時訓練軍士俾成勁旅劉長佑見將兵勇分別撤留擬仿湘軍營制分飭各營照式遵辦並派道員黎獻等逐

日督同操練所籌尙屬周妥練兵之道南北情形不同總在因地制宜期於盡善著卽就南省營制量爲變通趕緊辦理一面將辦理詳細情形先行具奏該督久歷戎行所稱操練月餘可望一律整齊想必確有把握不至徒託空言也至直東豫三省交界防勦事宜一日未竣卽兵勇一日不能裁撤劉長佑見在所部及各軍馬隊尙有一萬數千餘人每月共需銀八九萬兩餉項浩繁自應豫籌接濟著劉長佑會同崇厚將直省軍餉何項可撥何款可籌迅速妥議具奏候旨遵行吳再升旣經派令募勇訓練卽著劉長佑嚴加督飭俾有成效儻不能得力仍奏明發遣不得以有旨飭赴軍營稍存遷就之見將此由五百里各諭令知之○辛亥曾國藩彭玉麟奏忠逆李秀城在六安州下竄鮑超卽由柘皋進兵以攻巢縣之北劉連捷等又從迎珠塔進兵以攻巢縣之東惟欲圖

巢縣必先取東關銅城牐臣與彭玉麟商令蕭慶衍等專攻銅城
牐派水師曾泗美會合劉連捷等專攻東關偽閘天安蕭逆擁眾
堅守劉連捷令師船由蟹子口潛渡陸軍緣隄埂而進伏於九峯
山下另派譚國泰帶勇數十人從東關近處以木盆夜渡突偪賊
壘賊以礮石外擊胡德雲等架梯直上中礮死之劉連捷遂督兵
繼進曾泗美列礮環轟壘賊欲遁九峯山下伏兵齊出衝殺立破
石壘遂克東關七陳村等處來援之賊劉連捷親率副後等營迎
敵毛有銘由九峯山斜刺而入賊乃卻走俄又從林頭鎮吳家村
擺隊而來毛有銘等分道並進搏鬪移時王載駟等卽帶部卒搶
上九峯山曾泗美率三板從河曲中出斷賊歸路盡焚各賊卡賊
館而還其陸師之分攻銅城牐者蕭慶衍等軍由黃墩渡河約會
喻俊明等水師四營奮攻賊伏匿不出於南北兩街各添四壘爲

負嵎死守之計四月初九日各軍商畱彭毓橘所部扼守八角廟分蕭慶衍所部移剿百旺市一帶先清銅城牘之後路接戰正酣三汊河雍家鎮兩支官軍亦至遂將兩處卡壘平毀水師之入南北圩者環賊壘之三面皆有三板小划陸軍亦萬槍齊發遂踰毀南街土壘並攻破銅城牘駢屍塞道幾無脫者而林頭鎮另股亦旋爲水師擊走此次力戰陣亡之千總彭勝華等應請飭部從優議卹曾國藩奏查大江兩岸雨花臺賊匪堅守如常蕪湖甯國南陵數城金柱關灣沚西河數隘防務尙鬆涇縣守將易開俊於四月十八日在章家渡擊賊大勝朱品隆亦在青陽境內擊賊屢勝徽州自王沐回景德鎮後賊又從太平竄入歙縣之許村唐義訓督軍擊卻追出箬嶺李榕進攻建德二十三日再戰克之臣檄令進剿彭澤鄱陽會合韓進春等埽除上游羣賊大江北岸自忠酋

下竄賊勢漸衰我軍攻克東關銅城牯劉連捷進紮望城岡彭毓
橘進紮巢縣東門水陸攻擊於二十二夜克復巢城見檄鮑超蕭
慶衍諸軍進取和含二浦直達九洲翼驅賊併歸南岸壽州被
圍毛有銘成大吉分路援壽均以餉缺未能成行昨鮑超自樅陽
登岸苦無途費其部卒逃散一千餘人毛有銘自東關啟程其部
卒亦逃散數十人是兵事之遲鈍半由餉需之奇絀臣忝任江督
已滿三年統軍過多月餉不敷甚鉅唐訓方李世忠索餉之文月
凡數至誠恐積日累年更無成效仰求 皇上天恩特派大員來
南於欽差大臣兩江總督二篆中分綰一篆俾臣責任略輕不勝
感激悚切之至 上諭議政王軍機大臣等曾國藩奏懇陳餉需
奇絀情形並請特派大員來南會辦及曾國荃亦有辭浙撫之奏
各等語已嚴飭晏端書等將廣東釐金儘數全解沈葆楨將九江

洋稅按月如數批解矣曾國藩督師九載運籌決策屢克名城該大臣堅忍耐勞久爲朝廷所倚重近因所轄地方太廣所統水陸兵勇過多而各省餉銀又復不能源源接濟深懼責大任重稍有蹉跌則大局立虞決裂所奏自係實情惟當此時事孔棘之時正臣工黽勉效忠之日曾國荃擢升浙撫朝廷因材器使原以左宗棠總督閩浙軍務綦繁而浙省不可無人分任將來金陵克復後曾國荃應卽赴新任一切藉資整頓該大臣惟當督率曾國荃忠誠報國力捍時艱正不必受寵若驚固辭恩命至曾國藩籌兵籌餉盡心竭力勞勩殊關廩念第各省軍務方殷人材又不可多得該大臣惟當勉爲其難仰體朝廷兢業之心交相儆惕以期天心佑順而大局日有轉機見在皖省賊勢已衰惟苗練背叛勢已猖獗南望不勝焦慮昨據唐訓方馳奏蔣凝學一軍已至壽州城南

毛有銘亦由六安繼進仍著該大臣迅飭諸軍援救壽城並分兵解蒙城之圍毋許遲誤巢縣既克賊勢東趨並著檄飭鮑超蕭慶衍等乘勝進取和含二浦直偪九洑洲賊壘彭玉麟亦當督飭水師駛赴下游會同揚防舟師肅清江面並著都興阿等隨時嚴飭梁正源等督帶礮刻相機會同擊剿俾該匪南北隔絕則九洑洲之師更易得手前據都興阿等奏賊匪擾及天長縣東之玉興集該匪曾否回竄見在鮑超等率師進剿該逆被剿窮蹙難保不分股東竄仍著都興阿等嚴飭各營豫爲防範毋稍疏虞曾國藩另片奏雲南迤東道黃冕請暫緩赴任擬令前赴揚州會籌漕務等語兩淮鹽務關係餉需甚鉅旣據該大臣奏稱黃冕久宦江南熟悉漕政著准其暫緩赴任飭令迅赴揚州與運司郭嵩燾將漕務認真整頓俾積弊消除則餉需可期漸裕將此由六百里各諭令

知之○諭曾國藩奏兵事遲鈍由於餉需支絀徽甯兩防月餉全賴江西漕折一項接濟嗣經沈葆楨將漕折銀兩畱供本省防兵而徽甯兩防遂無一毫可恃之餉江西通省釐金又因江浙等處支去八萬致實解皖營者寥寥無幾廣東釐金奏定專充浙皖軍餉近亦有畱供本省之議餉需匱乏譁潰堪虞請飭江西等省趕緊籌解等語曾國藩所部各軍八萬餘人益以李續宜部下二萬人已逾十萬之眾而每月入款十餘萬杯水車薪豈能拯急近來鮑超一軍卽有苦無途費部卒逃散千餘之事毛有銘進剿苗逆亦因餉項無出部卒逃散數十人若再不趕緊接濟萬一飢疲之兵相率譁潰東南大局何堪設想曾國藩督兵九載從無益餉之請今據滬陳各情定屬非常緊迫晏端書本係督辦釐金大員豈得專顧粵省置皖浙於不顧沈葆楨亦當念江皖唇齒相依保皖

卽所以保江力籌接濟著自奉旨之日起沈葆楨於九江洋稅項下每月撥銀三萬兩源源解皖濟餉晏端書黃贊湯將所辦釐金銀兩全數解赴皖浙本省不准再有截畱晏端書等儻仍畛域攸分不以國事爲重致誤大局必惟該督撫等是問將此由六百里各諭令知之○諭耆齡奏交卸督篆日期並將所辦防剿事宜及所部兵勇移交左宗棠接辦一摺湘師見以全力進攻富陽聞省援軍自以嚴防賊由江西鈔越後路爲急耆齡業飭飛虎等營移紮廣豐並令畱紮蘭溪之南康各營相機策應卽著左宗棠督飭在防將士實力扼守其分防義橋聞家堰及駐守處郡各軍並著左宗棠隨時調遣毋失事機順永匪勢蔓延兵勇屢挫亟應迅速撲滅免致燎原著徐宗幹督飭趙均等各營合力進剿迅將各股匪徒悉數殲除毋畱後患臺灣各軍自嘉義解圍後連破賊營五

十餘座並有擊斃逆首林懋晟之事是該處軍威已振徐宗幹務當督飭吳鴻源等軍乘勝進剿埽穴擒渠至副將曾元福一軍已由泉州行抵鹿港卽令會同總兵曾玉明迅速進圖彰化縣城庶分路環攻可望剋期蕆事耆齡交卸事竣卽著馳抵福州將軍新任以重職守將此由五百里各諭令知之○諭官文奏藩司患病請假並催軍援陝各摺片藩司李桓由湘募勇抵鄂忽患中風之證勢難卽赴陝南接辦軍務著照該大臣所請賞假一箇月卽在湖北省城趕緊調理陝南軍務萬分喫緊李桓因病羈留不克前進該處見有兵勇各路援軍亟須知兵大員爲之統率力加整頓本日據官文奏漢中待援孔殷已飛催前派援陝之李雲麟一軍遄行馳抵漢南妥籌剿辦等語所籌甚屬妥協郎中李雲麟先後經官文駱秉章等交章保薦稱其曉暢戎機堪膺統帥本日已明

降諭旨將李雲麟以四品京堂候補漢南在防兵勇並川省援兵均歸節制矣李雲麟既膺朝廷簡任當思感激奮興力圖報稱著卽督率所部星速拔隊西行不准片刻遲畱到陝時卽將見存兵勇實力整頓駱秉章派往援陝之張由庚朱桂秋所部各軍卽著抵陝時併歸李雲麟統帶妥爲調度並著駱秉章飭令該員等各率所部迅速馳抵漢中不准遲延時日李雲麟於馳抵漢南後所有一切軍情著卽由李雲麟專摺奏聞以期迅速其李桓原帶之楚軍並著官文派員管帶起程交李雲麟帶赴漢南以厚兵力該京堂務當振刷精神一新壁壘迅奏膚功始爲不負委任多隆阿勦辦渭河南北兩岸回匪暫難分顧漢中見旣飭令李雲麟前往勦辦多隆阿卽可專意勦回兼顧省防瑛榮亦當督飭漢南各軍懍遵約束以備攻勦所有李雲麟統帶各營軍火糧餉並著多隆

阿瑛槩設法分撥解濟以期士飽馬騰廓清邊圉將此由六百里
各諭令知之○諭馮子材等奏水陸官軍迎剿鎮江東路悍賊連
戰皆捷一摺蘇浙敗匪屢思併力渡江北犯鎮江東路丹徒鎮爲
水陸扼要之區尤爲賊所窺伺此次賊由越河洪山凹下犯而諫
壁孩溪之賊復沿江撲擾疊經水陸各軍連戰皆捷見已遁回丹
陽老巢剿辦尙屬得手惟賊蹤出沒靡常時思北渡自越河至丹
徒鎮一帶尤應嚴密守禦著卽督飭賴鎮海等嚴飭各師船聯絡
堵禦並飭各路官軍迅將鎮城東南一帶逆氛盡力掃蕩以期節
節進剿偏攻丹陽老巢賊蹤飄忽靡常鎮防南北兩岸均屬緊要
並著隨時知照都興阿等聯絡水師一體嚴防以資得力將此由
五百里各諭令知之○命候補郎中李雲麟以四品京堂候補辦
理陝西漢中剿匪事宜○子安徽被戕知縣蔡鐸祭葬世職○壬

子吳棠奏擒匪張落刑之姪張總愚等匪由盱眙竄至天長南境與僞忠王由滁州江浦北竄之匪合股繞至天長北境意圖由高郵西岸之小河口搶渡經遊擊陳順超帶勇迎剿斃賊二十餘名該逆大股忽又來撲陳順超開礮轟擊適副將龔云福等在小河口後街與賊往來衝殺陣斬悍賊百餘名賊始退入小河口鎮內其搶渡賊股亦經水師開礮擊退二十三日龔云福等乘賊不備拔柵突入該逆紛向小河口鎮逃西竄去官軍追殺多名二十五日髮逆大股又繞至小河口以南列柵十餘座黃開榜親督各軍迎擊該逆一股來撲一股屯紮小河口南山經參將黃國瑞鈔入賊後生擒僞丞相林有元等賊陣擾亂龔云福等帶隊夾擊逆眾始行敗退官軍追斃髮逆多名一面嚴防金溝等處以杜奔突據林有元等供稱忠逆糾合燕逆豹逆等死黨數萬意圖竄擾清淮

裏下河臣部見無可調之兵查有遊擊陳浚家等所帶礮船五十隻前經撥赴皖境防苗臣因湖防再警不得不先其所急已飛檄星夜折回高寶湖嚴扼髮逆竄越一俟賊氛稍遠再赴皖防上諭議政王軍機大臣等都興阿等奏賊擾天長防剿獲勝並水陸堵剿李顯發復回六合各摺片吳棠奏剿逆獲勝畱船防湖暨宿南軍務駕馭李世忠情形請將尹作賓免遣畱營各摺片大股逆匪由來安竄圍天長復糾合捻匪圍聚於天長各路經都興阿等派兵往剿在金家集等處接仗獲勝其由小河口搶渡之賊亦經吳棠派防水陸兵勇疊次擊退惟逆數眾多兇熾甚熾意在攻撲儀揚竄赴裏下河都興阿等務當督飭將士嚴密設防毋任竄越以期力保完善並著吳棠嚴飭水師將弁力扼小河口等處以固湖防其邵伯等處及下游水師布置防守均尙妥協仍著都興阿

等飭令管帶水師各員嚴加防範毋稍疏忽李顯發前赴揚營謁見都興阿等極言並無縱放勇丁情事是李世忠之令該副將赴裏下河查拏游勇其心尙知愧勵見經都興阿等諭令折回六安防守因兵勇餉源無出擬在儀邑泗源溝及瓜州七濠口地方設立釐卡稍資接濟自係實在情形惟任其設立釐卡必致作威倚勢層層剝削苦累商民然不准其設卡則必須設法撥給月餉若干方免爲所藉口著吳棠卽行妥籌酌覈辦理見值粵苗各逆鴟張李世忠既可激勵使爲國家效力自當妥爲駕馭不可令懷疑貳吳棠所奏不爲無見該漕督務當加意籠絡並著都興阿等一律辦理不宜另生嫌隙格林沁見攻淄川未能卽行南下所有宿永等處扼剿苗逆事宜仍著吳棠督飭姚廣武就見有兵力實力防剿毋得專待援兵致滋貽誤已革遊擊尹作賓打仗奮勇並

隨克孫瞳著有勞績著准其暫免發往新疆畱於吳棠軍前效力贖罪仍著吳棠察看如不能得力卽行起解毋稍姑息將此由六百里各諭令知之○諭前因瞻對野番滋事滿慶恩慶奏派糧員李玉圃統帶漢番官員及番土各兵前往勦辦當諭該員會合川中委員協力攻剿乃本日據崇實駱秉章奏藏中所派土兵已到巴塘甫經入境卽肆搶掠將火藥局側民房及橋梁並行折毀遞送公文塘兵皆被剝衣奪食又因需索夫馬圍攻巴塘土司住寨開放槍礮傷斃人命且防剿甚不得力等語李玉圃本係奏參查辦之員滿慶等前奏稱其疊著勞績才堪勝任並懇破格錄用乃該員於甫抵川境卽敢縱兵滋擾是瞻對之患未除臺站已被騷動爲患曷可勝言滿慶等於該糧員毫無覺察仍復捏詞粉飾欲以剏辦瞻對爲詞派令督帶土兵爲冒功掩罪地步實屬昏憤殊

堪痛恨見在川中軍務未竣籌餉亦絀此項土兵一萬三百餘名防剿既不得力何得以有限之帑金供無益之邊費且恐藉端尋釁貽誤地方著滿慶恩慶迅將李玉圃及此項土兵趕緊全數撤回各歸本境嚴飭約束儻因循貽患必惟滿慶等是問其藏中邊備並著滿慶等嚴爲備禦不准稍有疏虞李玉圃本有參案應行查辦此次復圍攻土司住寨傷斃人命豈容任逃法網著福濟景紋於繞道赴藏後遵照前奉諭旨迅將該糧員參案查明並會同崇賢駱秉章將此次縱兵搶殺各情一併查明嚴行懲辦以肅法紀至膽對與裏塘土司構釁本係蠻觸相爭駱秉章所奏無煩勞師遠涉惟有派員開導使之斂兵歸巢等語實爲動中竅要卽著駱秉章令道員史致康及該處文武各員妥爲辦理務當剴切曉諭使之各釋嫌怨斂兵歸巢疏通驛路方爲妥善如果不遵理諭

必須警以兵威卽由駱秉章酌量調派迅圖蕝事以副委任將此由五百里各諭令知之○予故浙江巡撫王有齡建祠江西陣亡教諭余俊干祭葬世職○癸丑諭議政王軍機大臣等晏端書黃贊湯奏提臣馳赴高州督勦粵省缺餉擬辦勸捐及廣海寨陽江陽春等處軍情張敬修見仍患病丁日昌調往高州等各摺片廣東信宜縣城被匪陳金缸占踞已閱三年之久復有那旦匪黨李四等糾眾萬餘與信宜竄出匪股圍攻八甲地方直撲陽春縣城其新甯縣之廣海寨及陽江電白等處均有匪擾而陳金缸一股尤爲巨欸見已蔓延高屬幾徧與粵西潯鬱所屬之岑溪容縣諸匪相連尤須早爲設法勦辦署廣西提督江忠義一軍本令前赴皖省嗣因皖省已有道員席寶田等募軍馳往而江忠義所部有已至粵省者因復諭江忠義毋庸赴皖徑行入粵將兩省情形酌

度何處最爲緊要卽行相機剿擊見在崑壽旣已督軍馳赴著卽督率卓興方耀等軍務將信宜賊踞險要迅圖攻奪克復城池並與江忠義東西夾擊痛殄逆氛蜚家山古隆村逆壘旣經官軍平毀著晏端書黃贊湯飭令吳昌壽督率衛佐邦等速卽攻破南塘村進逼廣海寨並飭守備侯勉忠等軍將陽江陽春電白等縣竄擾之匪一併迅速埽除以免爲所牽掣丁日昌旣隨崑壽赴高州卽著毋庸再行赴滬張敬修舊疾未痊亦著毋庸帶勇助剿守備關鎮邦等所帶東莞勇丁務須講明紀律毋得仍蹈東勇積習徒滋糜費省城巡防晏端書黃贊湯與署將軍庫克吉泰等均須認真整飭一切妥爲籌辦毋稍疏懈至本省軍餉旣經訪有紳士龍溪等勸辦捐輸以資接濟著卽責成該紳士等秉公覈實妥爲辦理總期有裨軍食無病民生斷不准有不肖紳士湮迹其中把

持侵漁及藉端擾害等情敢干重咎粵釐辦理究竟有無起色仍著懷遵昨旨速將曾國藩軍餉竭力籌濟毋稍玩延將此由六百里各諭令知之○甲寅諭議政王軍機大臣等前因江忠義奏起程赴粵頭隊計抵桂林當卽諭令前赴粵省毋庸赴皖茲據毛鴻賓奏稱皖南之賊計圖上竄江西皖北大股賊匪計欲窺伺英霍分擾鄂境情形萬分喫緊江忠義由醴陵入江程途較近江忠義奏籌度緩急情形請仍遵前旨就近援江各一摺江忠義一軍無論援粵援皖均期於軍事有濟見在江忠義疊經曾國藩等函稱催令入江所部陳鳴志等各營已先後可抵醴陵是其赴江程途較近於赴粵卽著江忠義先其所急迅率所部各營望江西進發毋再中道徘徊致誤戎機入江後卽督飭席寶田等軍會同皖省之兵覘賊所向迎頭截剿保全江省完善之區廣東陳金缸股匪

尙未殲除崑壽帶兵往剿未知能否迅速肅事江忠義肅清江西
之後察看皖省如可無須增兵而廣東軍情尙緊卽照該署提督
所擬由贛州便道赴粵相機剿辦未爲不可江忠義旣已入江所
有援皖之軍毛鴻賓卽可暫緩添調惟廣東陳金缸股匪蔓延日
久若與潯郡勾結必爲兩粵巨患崑壽雖已出省會卓興等軍剿
辦而兵力尙不甚厚恐尙未知江忠義不能赴粵須待此軍援剿
著毛鴻賓迅將江忠義不能赴粵情形咨會晏端書黃贊湯俾得
就見有兵力迅速剿辦將此由六百里各諭令知之○乙卯諭內
閣都察院左都御史載齡奏特參庸劣不職之科道請分別勒休
辦理等語給事中鳳寶老悖昏庸形同木偶惟尙無劣蹟著卽勒
令休致御史許其光把持京畿道事務於尋常案件任意延閣卽
特旨交辦之案經該堂官等屢向催問仍復一味枝梧御史慶保

聲名平常亦難勝任均著回原衙門行走御史福珠隆阿不知自愛有玷官箴著卽革職都察院職司風憲各科道有稽察彈壓之責必須學問優長人品端正方能無忝厥職嗣後該堂官遇有似此不能稱職之員卽行隨時參劾毋稍姑容其有平日辦事勤奮品行端謹遇事敢言有裨國計者該堂官亦當酌量保薦以收得人之效至京察年分列考仍遵照前奉諭旨不必拘定成案以抑奔競而肅臺規○丁巳曾國藩左宗棠李鴻章奏據江蘇候補知府趙炳麟稟稱堂姪布政使銜福建糧道趙景賢於三月十八日在蘇城遇害並稱趙景賢被執到蘇後求死不得自太倉敗賊回蘇播言趙景賢勾結內應有襲蘇州之意僞暮王譚紹洸設席招飲趙景賢肆口謾罵譚逆卽取洋槍對胃一擊而殞查該故員誓守湖州血戰三年並分兵克復遠近堅城賊不敢偏迫賊以大股

合圍時閱五月糧盡援絕而陷該道抽刀自砍爲賊所持執至蘇州百計誘偪矢志不移卒以身殉洵屬忠貞蓋世無愧完人其長子深彥年甫十二聞湖州之陷痛父情切卽先服毒自盡次子五人濱彥潤彥滋彥溱彥遠寄湖湘孤苦無依相應詳細陳明請旨照陣亡例從優議卹並請特旨予諡准於湖州本籍地方建立專祠及殉難事蹟宣付史館立傳以彰忠藎 上諭內閣趙景賢係湖州在籍紳士並無守土之責集團禦侮每戰必捷迨至孤城固守糧餉軍火俱盡仍復堅持數月力竭被擒經賊匪誘脅百端矢志不移卒以身殉勁節孤忠實屬可嘉可憫布政使銜福建督糧道趙景賢著改爲照巡撫陣亡例從優議卹並加恩予諡准其於湖州地方建立專祠其業經議卹之趙景賢長子趙深彥著一併附祀所有該員事蹟節略著宣付國史館予立特傳以彰忠

蓋其子趙濱彥趙潤彥趙滋彥趙溱彥趙淶彥均著俟及歲時交吏部帶領引見尋予祭葬世職諡忠節○僧格林沁國瑞奏查淄川賊匪劉德培負隅死守經臣等督飭挑挖環濠設立營壘並用礮轟擊城垣已有缺陷之處遂督飭各軍於五月初七夜間進攻該逆拌命堅守槍礮甚密兵勇攻撲多時未能搶進竇因各營兵少勇多不諳紀律以致急切未下見仍督令設法攻取以期及早蒞事至鄒縣教匪經翼長舒通額等督隊防剿四月二十一日誘賊出山伏兵鈔擊鏖戰三時之久賊始敗退追殺二十餘里斃賊一千餘名生擒悍賊三十五名總兵黃國瑞於五月初二日派參將張從龍等往鳳凰山進攻東南兩面密令馬步在山坳要路設伏該總兵自帶小隊直抵白蓮池賊圩東門誘敵棍匪頭目劉雙印等在圩內抵拒復突出馬步賊五六千人另有賊匪數千在山

頂接應該總兵誘賊於四五里外卽遇副將郭寶昌等伏兵接戰我軍列仗回攻賊仍抵死不退適參將康錦文等帶同豫伏馬步翻山接應該總兵復由小路上山督隊截賊隊爲兩段殲斃數百名生擒匪首劉雙印餘匪狂奔天晚收隊據劉雙印供稱情願暗招匪黨作爲內應查劉雙印怙惡已久自應明正典刑惟該逆餘黨尙多且白蓮池西路不易進攻似宜將計就計先將該犯解交滕縣監禁暫緩處死飭令設法通知餘黨暗爲內應以便相機進取見飭黃國瑞探明路徑與舒通額等聯絡夾攻迅圖撲滅再探得宋懔詩築圍自守收畱各股餘匪及遣散降眾屯聚該圩謀爲不軌自應趕緊剿除以絕後患_上等前派翼長蘇克金帶隊駐紮河間又有恆齡所帶馬隊如果宋懔詩被剿他竄當足會剿業經密咨直隸總督劉長佑派撥官兵定期知照恆齡蘇克金以便會

合兜勦並請飭下劉長佑將宋憬詩一股速籌勦辦以便臣等抽調恆齡蘇克金兩軍統帶南征又據嶧縣知縣張振榮稟稱四月十一日有馬賊二三百名由滕縣竄入嶧境西南飛奔韓莊假充官兵渡河南竄當經臣等札派佐領訥莫津等帶領各勇前赴徐宿追勦旋接吳棠函稱該捻逆沿途並未搶掠竄向宿州一帶多已薙髮反正經吳棠飭總兵姚廣武酌辦諒此股敗匪當不至勾結爲患臣等擬俟直東稍平卽當統軍南下上諭議政王軍機大臣等淄川督攻未下山東省各軍兵少勇多不諳紀律積習殊堪痛憾卽著僧格林沁嚴加督飭期與各營官兵奮力進攻迅速肅事鄒縣教匪經各路官軍扼紮進勦東西兩路均獲勝仗並將匪首劉雙印生擒辦理尙爲得手黃國瑞勇往前實堪嘉尙仍著僧格林沁督飭該總兵探明路徑與舒通額等聯絡聲勢迅將

進攻務將白蓮池鳳凰山賊巢攻破痛殄逆氛劉雙印罪大惡極
屢降屢叛自應明正典刑惟既據僧格林沁奏稱該匪首自供情
願暗招匪黨作爲內應如果於事有益自可暫緩其死卽飭黃國
瑞及滕縣地方官責令趕緊設法妥爲辦理如該大臣前在蒙亳
所辦甚合機宜若僅係該匪首暫求免死之計其言未必的實卽
著將劉雙印軍前梟戮以快人心而作士氣宋憬詩不軌情形亟
宜早爲撲滅朝廷早有所聞茲據僧格林沁所奏實難再事羈縻
以致養癰成患見在直東各匪旣已剿撫兼施漸就平定著劉長
佑乘此聲威派撥官兵迅卽知會恆齡蘇克金等軍定期會合將
宋憬詩股匪實力進剿蘇克金由河閒一路進兵自可兼顧北路
之防其直東毗連各境應卽如何嚴密設防無任奔突著劉長佑
妥籌布置毋稍疏忽如該督接奉前諭能將宋憬詩等設法擒誅

不煩兵力更爲妥善仍須將其死黨痛加剿洗脅從之眾妥爲解散以清遺孽直東地方漸就清理計其時亦近秋涼僧格林沁卽可返旆南征苗逆巨患未除唐訓方等兵力甚單餉糈尤爲奇絀僧格林沁前由皖省北行旣已撥唐訓方餉銀萬兩將蒙城亳州糧食撥給馬新貽以資食用茲復將歸德存糧撥給又恐皖省團練降眾備糧自效未能久持行令河南省於應解該大臣軍餉內撥銀一萬兩解赴蒙城交馬新貽激勵降眾實力防剿以待統兵南下實屬公忠體國大局通籌不遺餘力本日已寄諭張之萬卽將此項餉銀一萬兩迅籌撥解不准玩延翼長舒通額等在九女關追剿張守義等竄匪馬賊數百名竄回宿州薙髮反正是否可靠嚴飭總兵姚廣武及該地方官悉心體察毋稍疏懈閭敬銘所派署臬司呼震與總兵保德辦理東昌搜捕安撫各事宜卽著嚴

飭該員等認真辦理信格林沁及閻敬銘所請畱營之提督傅振邦降調知府王繼庭均著其畱營差遣曾逢年著准其帶印在營候克溜川後再將登州鎮印交李懋元接受任事將此由六百里各諭令知之○李鴻章奏查江陰縣屬之楊厘汛在蘇常之交爲沿江著名險要有悍賊二千餘人踞守提臣黃翼升總兵劉銘傳派得字營攻南門銘前營攻東門銘後營排紮東南之間以堵西塘市援賊西北兩門則有水師營官王東華等進擊縣丞劉盛藻等各督親兵搭架浮橋守賊施放排槍我軍傷亡甚眾唐殿魁左骹受傷劉盛藻赤足渡河指揮弁勇擁抵城下甫將雲梯架上城頭礮石如雨梁玉和等大呼登城各勇相繼直進賊酋李添得劉汰生各率悍賊抵住缺口劉盛藻激勵兵勇誓必登城其時王東華等正攻西北兩門劉銘傳調趙宗道隊伍助之童祖亮率各營

奮勇先登逆酋李添得劉汰生仍復抵拒經我軍鎗斃賊眾慌亂
遂乘勢一擁而入所有守城悍賊二千餘名殲戮殆盡賴榮光等
由西門進擒斬逆首趙向林等多名其逸出之賊又經方有才等
並水師關頭截殺無一漏網遂於二十二日將楊厓汛城克復其
南澗北澗西塘市踞逆聯營三十餘座均於是夜遁回無錫常州
等處劉銘傳遂督各營入城從此進取江陰當可漸次得手且可
遮蔽渡江北竄之路首先登城之副將賴榮光等合無仰懇 天
恩分別給予獎敘其餘在事出力文武員弁兵勇可否容 臣查明
歸入克復福山案內一併保獎 上諭楊厓一城爲南岸要隘見
今水陸官軍攻克其南澗北澗西塘市踞逆均遁回無錫常州等
處從此進取江陰當可漸次得手著李鴻章督飭水陸各軍步步
進逼規取江陰以收破竹之勢江陰既克以後卽須派撥重兵扼

紫聯絡通泰靖江聲勢爲進取無錫常州之計蘇常逆勢日形窮蹙或鋌而走險圖犯他處或暗設詭計撓我軍威均在意中李鴻章務當慎益加慎戰守兼籌毋得稍有疏失致爲該逆所乘其渡江北竄之路尤須妥爲兼顧毋令該逆得以偷渡教習炸礮之法國人畢乃爾呂加該撫所請酌給三四品頂帶之處是否願隸版圖卽著妥爲辦理御史丁紹周奏蘇省紳民捐輸未盡給獎請飭催迅速查明具奏並按照奏定章程將各府廳州縣應廣學額查覈請旨等語著李鴻章會同曾國藩吳棠飭屬詳細查明分別辦理原摺著鈔給閱看將此由六百里諭令知之○諭張亮基奏擊退髮逆獲勝古州廳城失守請簡貴州提督遵覆龔自閔辦事情形各摺片髮逆由清水塘竄擾仁懷縣屬之魯班場遵義縣屬之松林高坪等處經總兵沈宏富擊敗餘匪竄往綏陽縣之望巢地

方其竄木烈鋪另股亦經總兵李有恆等於栗樹坪等處堵擊賊由瓢兒井逃竄出境仍著勞崇光張亮基飭令該總兵等乘勝跟蹤追剿務殲醜類毋令紛竄此次張亮基摺內所稱清水塘木烈鋪等處究係何縣所屬其由瓢兒井逃竄出境之賊究係出竄何境此係何股賊匪來自何處爲首者何人聲敘殊未明晰仍著張亮基查明覆奏嗣後奏報軍情於各州縣所屬地方務當指陳明確毋得草率含混古州廳城被賊匪余老科等占踞該處究竟有無黔省兵勇駐紮何以猝被失陷著勞崇光張亮基迅速調派兵練相機進剿該處距貴州省城較遠並著毛鴻賓飛飭駐防玉屏清谿之周洪印等軍就近援剿與黔軍夾擊毋得稍分畛域其該城文武下落卽著張亮基查明具奏貴州提督一缺該署撫力難兼顧亦係實情著於該省鎮將大員內擇其平素帶兵得力者酌

保數員候旨簡放其韓超前奏龔自閔固執偏見等情既經該署撫查明並無不合仍著飭令該臬司隨事認真毋蹈愆尤致干咎戾將此由六百里各諭令知之尋張亮基奏清水塘係遵義縣屬木烈鋪係大定府屬石逆部下賊目李藍自雲南境竄威甯州擊敗後由木烈鋪瓢兒井竄四川與石逆合一賊目李宰輔敗竄綏陽經婺川官兵擊退亦竄四川黔邊肅清報聞○景綸等奏黑背餘匪崔幅得等逃至赫哲抓吉地方經佐領春福派兵拏獲並帶領赫哲尋至圖勒密接獲逸犯徐泳解至卡所訊究突有俄官西拉米起率眾持械將徐泳等二犯搶去該佐領按照條約向俄酋辯論令將該二犯送交中國治罪並經富尼揚阿備文照會俄人必欲待伊國大臣來至伯里再爲定奪並稱固畢爾那托爾欲駕火輪船三隻進松花江駛赴三姓與中國大員商辦事件該佐領

告以應照和約備文交卡官轉送不應俄國大臣親往該酋未理而散奏入諭總理各國事務衙門向該國住京公使理論景綸特普欽隨時防範○戊午 上復詣 大高殿祈雨○諭內閣候補四品京堂李雲麟見丁母憂著自聞訃之日起賞假兩箇月回旗治喪假滿後迅卽回營督軍馳赴漢中辦理剿匪事宜○諭議政王軍機大臣等多隆阿奏遵旨派援鳳翔並分路進兵情形各摺片多隆阿旣派兵分紮渭河以南造船運送糧食一俟兵至臨潼卽與省城通氣省城已可無虞馬德昭旣經派援鳳翔著瑛棨懍遵前旨剋日添足三千人交該提督帶赴鳳翔督同王夢麟認真剿辦迅解城圍不准再行藉詞截畱致滋貽誤曹克忠旣經行抵西安帶兵出省連獲勝仗長安鄠縣等處糧運漸通卽可飭令移營三橋以通咸陽一帶道路瑛棨亦當派兵協剿近省零星回匪

紮營城外與曹克忠聲勢聯絡毋得株守城垣仍前畏葸並將該省應辦事件次第辦理渭南等處已無賊蹤何以渭南並無地方官在彼經多隆阿催調尙未見到著瑛榮查明嚴催赴任勿任逗遛取巧金順等業經記名副都統遇有缺出卽可簡放惟各路軍營保舉出力人員甚多亦須俟有缺出始能陸續酌量簡放該將軍惟當督飭各員認真出力如勞績卓著朝廷自有見聞定當儘先簡授也本日據熙麟奏賊圍平涼已逾數旬而救兵不來城圍未解刻下多隆阿屢獲大捷逃來白吉銅城之賊數逾鉅萬焚掠搶殺慘不可言非迅調勁旅不可甯州地方亦有賊蹤肆擾請速派援等語甘肅兵力單薄且無得力之將多隆阿務須分兵兼顧嚴催馬德昭統兵迅解鳳翔之圍仍卽趕緊馳赴慶陽會商熙麟次第剿辦以紓朝廷西顧之憂多隆阿身爲統帥自當全局通籌

不可稍分畛域正在寄諭間據官文等奏李雲麟丁憂請賞假兩箇月回旗穿孝業經降旨允准並已諭令駱秉章迅飭張由庚督兵赴陝南暫行節制各營俟李雲麟假滿後仍令前往視師惟該員抵陝尙需時日張由庚能否勝統率之任尙未可知該處軍務緊要仍著多隆阿瑛瑩隨時兼顧並與駱秉章會商妥辦毋使稍有疏失將此由六百里各諭令知之○諭熙麟奏進剿平涼及甯州接仗獲勝並統籌陝甘軍務全局各一摺平涼回匪屢撲官軍營盤經遊擊馬天祥等督兵擊退其甯州賊匪亦經知州宋來賓守備馬天祿等迎剿獲勝惟平涼尙未解圍而白吉銅城各賊巢悍黨日增我兵數不滿千實形單薄著熙麟督飭馬天祥等就見有兵力實力防剿毋稍疏虞仍一面迅催各路援兵星夜來慶立解平涼之圍所陳甘省賊多兵少勢極急迫自係實在情形惟多

隆阿係督辦陝甘軍務該處剿匪正在得手萬難分兵赴甘且東路剿回大勝則敗匪勢必西遁白吉銅城等處增賊逾萬此亦情事所必至非多隆阿有意驅逼以鄰爲壑也該督身任兼圻惟當力爲其難不得以時局艱危遽思諉卸至馬德昭一軍多隆阿見令帶兵三千援救鳳翔僅能迅解重圍不但可保鳳郡且可遏賊西竄之路馬德昭於解鳳翔城圍後移兵赴甘先聲所懾必於甘省軍事有裨前已疊諭多隆阿迅飭馬德昭統兵援鳳並令瑛榮毋得再事攀畱本日又經諭令多隆阿妥籌兼顧毋置甘省於不問熙麟當思和衷共濟之義勿以小嫌而誤大局方爲不負委任將此由六百里諭令知之○海瑛以病免以龔自閑爲貴州布政使裕麟爲貴州按察使

前湖北按察使

○己未諭議政王軍機大臣等張

之萬毛昶熙奏歸陳見無警報擬合兵圍攻張岡及賊匪竄擾光

固情形逃將盧國勝請嚴拏發遣各摺片張岡踞賊甚悍見在既已合圍卽著張之萬等嚴拏各將弁合力攻克務將兇悍死黨悉數殲除勿任突圍他竄歸陳等處防務卽可知照袁甲三袁保恆督同該鎮道等妥爲經理儻有警信再行酌量移紮無稍疏忽捻匪由光固邊境竄至林家竄過河西擾該匪行蹤飄忽非同回竄蒙毫卽圖擾宛汝張之萬已派副將孫之友率領馬步馳往光息一帶卽著飭令確探賊蹤所向與劉鴻增一軍會合堵剿勿令竄擾完善地方與苗黨句合是爲至要已革副將盧得勝本係奉旨查辦之員經余際昌暫畱帶隊茲復因主將失利匿迹遠颺實屬目無法紀該撫等請發往新疆殊覺輕縱著卽飛咨湖北督撫一體嚴拏務獲卽行正法以肅軍律將此由六百里各諭令知之○沈葆楨奏逆匪右瞰饒州左窺景鎮其中路思由昌江偷渡以撼樂

平迨見我軍水陸聯絡復由景鎮上達祁門中間無專防之兵河淺灘高礮船未能上駛石太羣逆以數隊出沒黟界牽掣劉典一軍以萬餘人從桃樹嶺漆嶺分道潛趨掩我不備初七日已及閃上勒市一帶道員段起檄繼果營進擊而以祥字營爲後援十三日賊進踞包家墩次日王沐抵張村塢派隊由蛟潭潛伏而進至烏披頭慮賊鈔後伏兵深林飭王萼等分路夾擊匪眾翻山而逃墮崖死者無數我師馳抵包家墩該逆不料官軍驟至拌死抵禦王沐令各勇環放排槍殪賊百餘名賊退安甯王沐從中路鼓譟直前賊且卻且拒我兵極力衝突生擒百餘名解散五六百名據賊供僞天侯鄧天福鄧天豫均殞於陣查繼果一軍自皖回江喘息未定復挫兇鋒於江皖大局實有裨益又奏韓進春擊賊於土塘殺賊數十名進紮小港賊斂歸陶家渡河北與該軍隔河相持

其後股紛竄彭澤湖口都昌離城各二三十里不等知縣趙宗耀督團力拒督臣曾國藩檄道員李榕統東字營從東流援之不日可到湖口又聞提督江忠義一軍已抵長沙臣咨令取道袁瑞由九江徑趨湖口甘肅臬司劉于濤親督水師到饒席寶田一軍從撫州前進浙江臬司劉典亦拔隊來援計端節以前皆入饒境臣通飭各營悉聽劉典調度剋日廓清鄱境以援都湖不得互相觀望上諭逆匪圖擾江境進據包家墩經王沐督勇進剿獲勝賊敗竄嶺外洵足以大挫兇鋒惟該逆紛至沓來刻思上竄該撫奏稱劉典拔隊來援不日可入饒境著卽檄飭各營將弁悉聽劉典調度剋期廓清鄱境次第由都昌湖口節節掃蕩期與曾國藩派出之李榕一軍前後夾攻俾該逆竄遁無路自不難一鼓殲除江忠義計期應抵江境著沈葆楨飛催前進會同席寶田援師齊抵

饒防以厚兵力毋任遷延貽誤沈葆楨另片奏云甯永新龍泉等縣地方會匪勾結約期舉事經地方文武員弁先後拏獲匪首王敬谷等正法惟據稱四月初三日有匪徒二百餘人突至永甯縣城下雖經孫文銘等督勇追拏而獲犯無幾難保不潛匿山谷乘間再逞著沈葆楨嚴飭該地方官迅速搜捕務淨根株毋稍姑息致貽後患將此由六百里諭令知之○庚申諭內閣鑲黃旗滿洲奏已革副都統銜侍衛祥恩之母呈訴孤苦無依籲懇恩施以資養贍請旨辦理一摺據稱祥恩前經革職查鈔發往軍臺效力惟伊母已故理藩院尚書吉倫泰之妻年逾七十雙目失明止此一子子婦已故並無孫男孫女棲身無地度活綦難可否將鈔產賞還少許藉資接濟等語已革侍衛祥恩世受國恩不知謹慎當差力圖報效乃在勝保軍營任性妄爲肆行無忌甚至於查起勝保

寄頓之委員亦膽敢恃強毆打倚勢作威目無法紀實屬肇由自作罪無可逭惟伊母以殘瞽餘生衣食無資覽其哀訴各情實堪矜憫所有祥恩鈔產應如何量爲賞還伊母之處著總管內務府大臣酌擬具奏○唐訓方奏據馬新貽稟稱近日察看蒙城賊情稍懈商令總兵王才秀等出城攻擊遂於四月二十四日先派勇目宋禧沅等帶所部馬勇出西門繞至南門排列以綴南路之賊令王才秀等出北門攻沿河賊營徐鵬等攻正東賊營遊擊施紹恆參將李南華等攻東北東南兩路分投並進該逆倉皇失措我軍乘勢躍過長濠拋擲火器延燒賊營徐鵬等急督勇練衝入連刃悍賊多名王才秀等亦將沿河賊營攻破兩座該逆冒死狂奔我軍立將城東附近賊壘十餘座分隊占住並將長濠一律填平惟東南河北一帶賊營堅守未下是役共計斬馘千餘級蒙邑自

有此捷方期激勵將士迅解城圍適據英翰稟稱連日進攻韓村急切難下突有苗黨鄒煥林等占踞劉家圩四面裹脅李允李大箇子項盤等亦由雉河竄至龍山西北泥寶集丹城一帶聚黨裝旗鄒煥林等復乘勢偷襲張家寨續據馬新貽稟稱捻匪蘇老夢等盤踞亳南劉家集耿皇寺三丈口立德寺寶光寺等處遙爲苗逆聲援阻我糧道張總愚等股復經苗逆誘令紛竄雉河西洋集一帶該集投誠捻首葛春沅糾合葛大牛等復叛高鑑集捻匪高加等亦乘機作亂渦河南北徧地捻氛蒙亳聲息不通糧源頓絕刻下文報僅有宿州一綫之路而沿途復有賊馬往來必須夜間潛遞不得已分隊駐紮小澗集侯家圩兩處兵分愈單恐宿州亦終阻絕臣得報之下憂心如焚幸僧格林沁所派佐領訥莫津等馬隊進剿山東竄捻已到宿州上當飛飭該佐領等會同英翰抽

撥勇練校巡龍山雉河一帶遇賊卽擊以期絕處逢生至蔣凝學
毛有銘兩軍雖抵壽境尙未解圍清江戈船疊次飛調迄今未到
而苗逆近抽悍黨麇集懷城臣部黑窩各軍不日當有大戰但無
餉無糧未能拔隊遠去且淮河南岸兵單其勢亦難抽撥是黑窩
各軍勢如騎虎而蒙軍爲尤甚似此苗捻交乘不但日有北竄之
虞而由宿州趨出靈璧卽可阻絕淮糧運使我坐困臣再四籌
維山東臬司丁寶楨新招之軍恐難得力和含聞均克復鮑超進
擣二浦距蒙城水路甚遙亦屬鞭長莫及惟有李續宜部下歸曾
國藩調度之成大吉一軍見駐麻城之宋埠鄂省兵力尙厚足敷
防剿麻城密邇商固若蒙城幸存成大吉自商固潁太趙毫程途
較捷或可援救然以視僧格林沁之聲威究屬不及應求 聖明
迅賜施行大局之幸也 臣營存糧不敷已與勇丁同食豆粥情形

危迫臣惟有竭力支撐斷不以餉絀兵單稍存恇怯 上諭議政王軍機大臣等渦河南北徧地賊氛糧艘被劫蒙亳聲息不通城中見糧僅敷五日萬難久持僧格林沁前派佐領訥木津守備桂錫楨等馬隊追剿山東竄捻已到宿州見經唐訓方飭令會同英翰梭巡龍山雉河一帶而蒙亳宿永處處伏莽兵力較單實有兼顧不遑之勢見在蒙城情形危迫萬分設被苗逆占踞則兗饒兗張非獨皖北地方爲賊吞噬卽豫東兩省亦將被賊肆擾大局何堪設想以目下南北情形而論皖北軍務較之東省緊急百倍僧格林沁一軍爲淄川一隅牽掣未能親督兵勇卽時南下亦須分撥一旅迅速赴援以期顧全大局並著於恆齡蘇克金二人中酌派一人統兵前往以資得力昨因張之萬請撥馬隊赴豫剿捻當經諭令僧格林沁酌派數百名前往此時如援皖兵力不敷調遣

卽著將派往豫省馬隊先行移撥皖省並由該大臣派撥若干派令前往援救蒙城毋稍遲延如前撥之馬隊數百名先已到豫張之萬不得藉詞截畱以期移緩就急丁寶楨一軍如尙未入東境卽著唐訓方張之萬等仍遵前旨沿途截畱移援蒙城如業已行抵山東則東省得此一軍價格林沁之軍更可派撥援皖並著張之萬毛昶熙於歸郡汝甯一帶先期布置嚴密設防以備匪黨紛竄陳州一帶卽責成袁甲三督飭袁保恆聯絡紳團豫籌防剿張之萬撥解臨淮之餉銀一萬兩務當嚴飭委員迅速解到不許稍延時日蒙城及臨淮軍營糧食垂盡唐訓方與勇丁已同食豆粥情形危迫如此豈容束手坐視見惟豫省相距較近臨淮蒙城水路亦惟陳郡可通袁甲三素顧大局著卽在陳郡設法勸捐無論穀米雜糧總以迅集成數卽由水路運赴臨淮蒙城兩處以救倒

愚該前督無論如何爲難均著設法迅速籌辦斷不可以不在其位不謀其政爲詞置之膜外宿州與臨淮消息尙有一綫可通總兵姚廣武見住該處著吳棠卽嚴飭該總兵迅速進援蒙城不准擁兵觀望並分兵兼顧靈璧母令苗捻各匪阻絕臨淮運道如兵力不敷卽著吳棠添兵速行往援並設法解運糧餉濟急力顧大局是爲至要成大吉一軍見駐麻城距蒙城較近此時大股逆匪東竄天六鄂省邊防已鬆卽著曾國藩官文嚴樹森飭令成大吉星夜兼程移軍馳援蒙城官文等不准執意奏留懷遠踞賊卽著唐訓方激勵諸軍迅速攻克壽州圍城賊匪著曾國藩唐訓方飭令蔣凝學毛有銘兩軍力加勦洗所調清江戈船著吳棠趕緊督飭前往廬郡一帶見無賊蹤曾國藩營兵力有餘若能籌撥一軍馳抵潁上直搗苗逆老巢則蒙城之賊勢必回顧或可解城圍之

急此時皖南賊勢已鬆卽著曾國藩妥籌迅速辦理李續宜假期將滿皖北時勢萬緊著卽迅速起程馳往該處督辦軍務毋再稽遲唐訓方摺著鈔給僧格林沁閱看金家集一帶陸路之賊已有回竄浦口九洲洲之意著都興阿等督飭水陸諸軍嚴密防範毋令東竄揚城其盱眙一帶築壘之賊及攻撲天長各賊均經黃開榜等水陸會剿疊次獲勝並解天長西北兩門重圍仍著都興阿等會同吳棠督軍力堵賊氛毋任紛竄至江陰賊匪屢有扮作難民渡江北擾之說都興阿等見飭水陸防兵一體嚴查並密查賊首黃姓務獲所辦甚是逆匪窺伺裏下河已非一日見當江防喫緊豈得任令南岸奸民紛紛北渡且賊踞江南已久該難民前旣相安何以此時忽欲北渡江陰令沈方煦遽請吳棠准令渡江該漕督不加查察且咨行都興阿等令水師不得攔阻市小惠而忘

大害何竟憤憤至此著卽嚴飭北岸地方官認真盤察並將續來難民一體禁渡儻漫不經心致令奸宄溷迹貽誤事機恐吳棠不能當此重咎也辦理荒謬之江陰令沈方煦著都興阿雷明阿吳棠會同查明嚴參以儆玩泄淮北鹽八萬引前據吳棠奏改南運見據都興阿等奏稱有引界混淆透私漏課及與捻匪湖船溷迹之弊著吳棠卽按照都興阿等咨明情節另籌妥辦毋得固執前見至吳棠與都興阿共辦一事惟當以大局爲重和衷共濟共圖保衛江北地方不可稍存意見致公務或有貽誤懷之將此由六百里加緊各諭令知之○辛酉諭劉長佑籌撥察哈爾官兵俸餉○壬戌雨○吳棠奏總兵姚廣武一軍於進扼童亭後又移紮謝家灣會同知府英翰進攻韓村該匪伏匿不出其迤東周家圩亦有苗黨盤踞糾眾來援經官軍擊敗回巢官軍乘勢搶入內濠該

圩練總周戍開門迎納悉將苗黨捆出正法官軍卽紮周家圩時有捻黨王得章帶馬隊三百名薙髮來投姚廣武察係真心投誠暫行收錄酌給口糧令赴鍾陽集隨同官軍扼守澮河四月二十一日姚廣武英翰合隊乘夜進攻韓村賊圩越過外濠斃賊數十名賊眾退入內圩官軍又復猛攻未能得手暫行收隊旋探聞苗逆勾結捻匪項盤李大箇子李允秦吉等由河南汝甯回竄雒河龍山西洋集一帶聲稱北擾宿徐姚廣武稟請撥軍助剿臣查宿州兵單賊眾防剿萬緊雖經親王僧格林沁派有馬隊數百名到肅仍屬不敷堵剿萬不得已將添防衡陽之副將艾憲銀馬步隊五百名檄飭拔隊赴宿以資防剿又准安徽撫臣唐訓方派遊擊田玉迎催援皖礮船見因天長解圍湖防稍鬆已飭遊擊龔文林礮船二十隻先行出湖赴皖隨同剿苗參將陳浚家礮船仍留高

寶湖西以防竄匪 上諭議政王軍機大臣等見在天長之圍雖解賊蹤尙未遠遁吳棠見飭黃開榜嚴扼天長湖河各要隘探明賊在何處卽督同龔云福等軍實力剿除勿畱餘孽黃國瑞一軍勦辦滕縣教匪生擒劉雙印解赴僧格林沁軍營懲辦實屬奮勇可嘉已諭令僧格林沁督飭該總兵探明路徑與舒通額等聯絡聲勢進攻務將白蓮池鳳凰山賊巢攻破惟鳳凰山道路深險匪徒兇狡恐黃國瑞恃勇輕進或致失利著吳棠飭令該總兵謀定後動當於勇往之中寓持重之意不可孤軍深入是爲至要苗逆句捻至雉河等集一帶聲稱卽日北擾宿徐吳棠已派副將艾憲銀馬步隊五百名赴宿州助剿並催令遊擊龔文林礮船出湖赴皖勦苗卽著遵照昨奉諭旨令姚廣武由宿州進援蒙城力圖解圍如兵力不敷仍著該漕督速行添撥赴援以期力保危城不得

稍分畛域投誠之王得章等仍飭姚廣武妥爲駕馭毋稍疏虞將此由六百里諭令知之○癸亥諭內閣禮部奏敬擬 文宗顯皇帝聖誕禮節服色請旨遵行各等語本年六月初九日 文宗顯皇帝聖誕朕御龍袍龍褂挂朝珠虔詣 奉先殿 壽皇殿行禮隨從人員均著穿蟒袍補服挂朝珠是日隆福寺 饗殿殿門外著派世鐸敬謹行禮○諭議政王軍機大臣等劉長佑奏降賊日益兇悖亟須兩省會剿一摺據稱降賊宋憬詩築寨屯糧廣樹黨與莘堂館冠各處賊巢均與呼吸相通其所踞之劉貫寨甘官屯又復逼近臨清實爲畿疆巨患允宜及時進剿大舉合圍惟直省兵勇防剿兼籌不敷分布如得僧格林沁大軍移營東昌進扼東南兩路直隸各軍由西北各路渡河夾擊冀可迅速奏功儻僧格林沁萬難分身請飭丁寶楨速赴東昌一帶會辦等語宋憬詩狼

子野心負嶠自固萬無姑容之理見在該逆兇狡情形日甚一日自應趕緊剿滅以除巨憝劉長佑所陳大舉合圍之策老成持重深中肯綮惟丁寶楨所部兵勇不過千餘人即使進紮東昌臨清一帶恐亦不足以遏狂寇僧格林沁聲威素著若能移營東昌進扼東南兩路不但可以遏賊東竄且於恆齡蘇克金各馬隊發縱指示呼應較靈劉長佑卽剋期親督諸軍由正北西北及西南各路渡河夾擊四面圍剿庶怙惡降賊可望一鼓殲除不至分路旁竄畿疆重地關繫緊要劉長佑惟當與僧格林沁等熟籌妥辦謀定後動斷不可草率從事致貽後患至淄川連營空濠各事宜業經僧格林沁辦理完竣蕞爾彈丸縱未能卽日攻克亦可無虞紛竄丁寶楨到東後卽著閻敬銘檄令統率所部前赴淄川助剿以期迅速奏功本日據丁寶楨奏馳抵泰安遵卽前赴淄川大營籌

辦等語著閻敬銘督飭該臬司將淄川地勢賊情會籌攻剿迅圖克復丁寶楨旣到淄川僧格林沁似可卽赴東昌與劉長佑會同勦辦另片奏密探鄒縣白蓮池股匪情形必須絕其出入之路方能得手所籌不爲無見卽著丁寶楨隨時稟商撫臣妥辦以期無誤事機將此由六百里密諭僧格林沁劉長佑閻敬銘並傳諭丁寶楨知之○諭穆騰阿瑛榮等奏東省敗匪西竄分撲城營官軍逐日接仗情形並曹克忠移紮三橋兵力單薄請飭多隆阿迅撥勁旅會剿及請調東三省官兵兼程來陝各摺片陝省東路回匪疊經多隆阿攻破巢穴該匪向西奔竄此等窮蹙敗匪氣餒必衰穆騰阿瑛榮等若能激勵軍士迎頭截擊何難將此股竄匪悉數殲除乃株守省垣一則請飭多隆阿迅撥勁旅再則請調東三省官兵不知該將軍等所部兵勇何不能得力一至於此擁兵不戰

雖多奚爲多隆阿見由倉頭移營前進著卽督飭諸軍節節掃蕩
迅由渭南臨潼等縣直達西安期與省城聲息相通俾無貽誤東
三省官兵徵調太多該處邊防緊要豈能再行添調馬德昭一軍
前已有旨飭赴鳳翔援救所有西安省城防剿事宜仍著穆騰阿
瑛棨就見有兵力認真督辦毋得稍有疏虞致干重咎瑛棨另摺
奏漢中情形危急石逆中旗見已由川入陝另片奏請飭官文等
速飭李雲麟梁作楫馳援漢中各等語前因李雲麟回旗窮孝不
克赴陝諭令駱秉章迅飭張由庚馳赴陝南援剿據瑛棨奏稱張
由庚見在駐軍廣元去陝不遠著駱秉章飛飭該道員等星速赴
援石逆中旗見在竄至平武之喬莊勢將取道甘肅文縣繞出漢
南並著駱秉章飭令張由庚相機迎擊毋令石逆餘黨與漢南髮
逆勾結爲患梁作楫計已督勇行抵興安著官文等嚴飭該員認

眞扼守並酌度情形移師漢郡與川省官兵會同剿辦更爲得力
李桓患病曾否就痊如一時不克西行卽著官文嚴樹森選派得
力員弁將李桓所募勇丁帶赴陝南剿賊俾免坐耗餉項嚴樹森
前有赴下游察看營壘以次由襄樊西上之奏見在駐紮何處著
與官文妥速籌商如能由襄樊徑赴鄖西俾梁作楫得以移師進
剿漢中逆匪庶於秦楚兩省邊防均有裨益仍著官文嚴樹森斟
酌辦理正在寄諭間據熙麟奏援平官兵中途失利請飭多隆阿
撥兵迅抵平涼援剿一摺平涼被圍日久經熙麟調派和英協同
任治國等先後督兵往援行至距平三十里之古城堡賊以大股
圍撲雖經力戰解散而范銘一營被賊蹋破任治國中槍陣亡傷
亡兵弁甚多是此股援兵已成畫餅平涼待援孔亟匪勢甚屬猖
獗稍有疏失關繫非輕著熙麟嚴催所調未到之兵剋日到齊迅

赴平涼以拯危急並著多隆阿抽撥勁旅數千交雷正綰帶赴甘
省應援其三原等縣各營著酌派得力大員接統其眾俾雷正綰
得以剋日成行多隆阿素顧大局自當權衡緩急隨時策應毋誤
事機駱秉章奏參逗留不進縱勇滋事之總兵熊煥章等已明降
諭旨分別懲辦矣惟甘省兵力本屬不厚熙麟所調援兵又復中
途潰敗必須設法添兵助剿仍著駱秉章酌調勁旅二三千人籌
給川資取道白馬關馳赴甘省以補多隆阿兵力所不逮庶甘省
軍務可期漸有起色也將此由六百里各諭令知之○李續宜奏
臣臥病湘鄉迄今四十餘日乃蒙 皇上天恩宥 臣遲延之罪開
臣皖撫之缺體恤下情無微不至詎四月以來病勢日增咳嗽不
絕於口吐痰咯血諸證不時舉發肌肉頓形消瘦咽喉疼痛非常
凡屬問疾人來罔弗見之流涕頃接曾國藩來函知湖北業已蕲

事六安解圍後忠酋因漚軍克復太倉回救蘇州曾國藩見檄鮑超等規復巢含南岸之徽夥將次肅清左宗棠又調劉典援景鎮曾國藩復派李榕由東建進紮祁門軍事日見平穩臣病十分危劇可否籲懇恩施賞假四箇月俾臣回里調養或一二月內可以強支卽當速赴皖省軍營與疾討賊斷不以假期未滿稍涉拘泥上諭李續宜著照所請賞假四箇月回籍安心調理惟刻下楚北皖南軍務雖可少鬆江北下游甚爲喫緊苗逆圍攻蒙城情形岌岌唐訓方漸有不支之勢亟盼該前撫赴皖督辦儻回里之後病勢漸輕仍當趕緊就道以慰皖北倒懸之望不必拘泥假期是爲至要將此由四百里諭令知之○左宗棠奏據探聽逆糾集各股竄踞觀音山板橋一帶進紮山口距新城僅三十餘里四月初一日魏喻義會同賴錫光等進剿遇賊大至官軍槍礮環擊斃

賊數百名賊死拒不退魏喻義分軍由小路鈔之自率親兵與賴錫光等所部殲其先鋒賊目數名賊始奔潰各營乘勝緊逼斃賊千餘生擒百餘名偽朝將汪逆復分路擾至永昌時山霧漫空魏喻義且戰且退至城東收隊入城逆賊躡蹤而至賴錫光等督隊由南門出擊賊勢稍卻蔣益澧卽遣提督高連陞復率數營馳援自率親兵督之令熊建益回防新橋之賊初三日高連陞馳抵新城之南臣飭楊昌濬率十營往援亦陸續行抵桐廬賊見援軍大至向臨安一路奔竄高連陞亦僅斬其尾賊數十名而還是日新橋之賊見官軍方援新城忽出賊分路來犯熊建益督隊迎擊斃賊甚多賊遂入壘熊建益率親兵踰濠而進直薄賊壘忽被賊施放火器洞穿小腹殞命賊亦不敢復出初六日偽聽王各逆至洪莊上陳泗洲庵等處布陣數十里誓破新橋官軍營壘次日該逆

徑撲王東林等營官軍列隊仰攻立斬悍賊十餘名高連陞分軍
埋伏自率親兵嚴陣以待俟賊撲近伏兵左右鈔擊共斃賊四五
百名陣斬僞朝將李逆等三十餘名生擒數十名賊爲槍礮轟傷
者殆以千計而逆賊鈔襲富陽官軍後路之計始沮先是水師副
將楊政謨都司羅啟勇各率所部師船沿江駛抵牯口遇賊船百
餘號當與上游戰艇開礮夾擊逆賊紛紛逃潰楊政謨等登岸追
殺直抵杭州望江門外踏毀賊壘一座殺賊數百名焚燒賊船數
十隻杭州踞逆大震屢呼聽逆及汪逆回援該逆等知官軍後路
嚴密無隙可乘又杭城之賊呼援甚急遂潛竄回杭勢甚窮蹙總
兵熊建益中礮捐軀深堪憫惻合無仰懇 天恩飭部照總兵陣
亡例從優議卹予諡並於富陽縣建立專祠守備劉立號同時陣
亡並請旨從優賜卹 上諭此次賊匪徑犯新城思襲富陽後路

雖經官軍擊退而劉典王文瑞兩軍尙須駐皖蔣益澧全軍力攻富陽其餘各營分撥上下各游防剿兵力實不爲厚是克復杭州尙難剋期而待左宗棠見擬將新隸閩軍力圖整飭相機進剿亦是因時制宜之法卽著將閩省營兵分別去畱認真訓練俾成勁旅一面於閩粵營官中慎選統領之員派令分營管帶庶將識士心士識將意可收餉節兵精之效至浦城地勢旣無須重兵屯駐卽由左宗棠酌派一軍駐之以護轉輸運道臺灣小醜剿辦幾及一年總無起色吳鴻源曾玉明旣均不能得力卽著與徐宗幹妥慎籌辦申明軍令激勵兵心以期早日蒞事沙縣等處土匪猖獗在事員弁辦理情形極爲怠玩若不從嚴參辦必致軍心益懈賊勢益張卽著左宗棠迅速查明嚴參懲處毋稍徇縱至閩省吏治軍務積習已深惟在該督實力整頓力挽頽風以副委任將此由

六百里諭令知之○諭崇實駱秉章奏密陳西藏實在情形一摺
據稱汪曲結布卽係前充葛布倫之璧喜歷來把持藏務見復由
配所潛回勾結李玉圃簧惑滿慶札調藉得明目張膽必欲屠滅
噶微呼圖克圖復藉勦辦瞻對爲名徵調各處土兵其意蓋恐福
濟等進藏認真查辦故大張聲勢以爲要挾抗拒地步請令撤回
土兵並先將李玉圃調離西藏等語汪曲結布與李玉圃狼狽爲
奸滿慶等事事受其挾制代爲蒙混奏請實堪痛恨本日已諭令
將土兵撤回保守藏地如瞻對夷酋入境卽爲勦辦不得滋擾內
地惟該土兵能否不恃眾滋擾殊未可知著駱秉章飭令該地方
妥爲防範如有滋擾情事卽行嚴拏懲辦瞻對野番近日情形如
何並著該督飭令史致康等妥爲辦理毋令延蔓藏中政務毫無
端緒亟須待人經理福濟景紋仍當遵照前奉諭旨繞道越藏將

交查各案件密速妥辦毋得遲延觀望將此由六百里各諭令知之○諭將徵呼圖克圖攜印潛逃來京控訴多係一面之詞未可憑信惟必得李玉圖來京質證方足以折服其心著滿慶恩慶卽行傳知該糧員務卽迅速來京質對無任遲延前諭滿慶等將李玉圖及赴川漢番各兵撤回著卽懍遵前旨將各土兵一律撤回防守藏地無得滋擾川省邊界川省餉項缺乏恐亦未能協濟此項土兵宜量加撤遣勿任恃眾擾害將此由六百里各諭令知之○予甘肅陣亡知府和英等浙江陣亡總兵官熊建益祭葬世職建祠○甲子諭內閣前據都察院左都御史載齡奏參庸劣不職之科道鳳寶等員當照所請分別勒休降革茲據內閣侍讀學士鍾佩賢奏部院堂官甄別所屬官員應公商會銜具奏以符體制載齡參劾科道四員係本衙門隨時考察與風聞言事者不同都

察院各堂官均應公同考覈今載齡單銜具奏是否商及同官而各該堂官意存曲袒不與會銜抑載齡並未會商有意專擅其風均不可開等語著都察院堂官將此次載齡糾劾科道因何不公同列銜及載齡所奏是否悉協允當之處據實明白回奏○乙丑諭議政王軍機大臣等劉長佑奏辦理營制情形開單呈覽並馬隊未能調赴河南暨請飭河南撥餉各摺片直隸營務廢弛所收練勇又多臨時召募旗幟隊伍不分號令難齊各營兵勇數目多寡懸殊以致臨敵各不相顧難收實效劉長佑見將所部兵勇按照楚營成式參酌北地形勢另立規制以五百人爲一營設立營官親兵哨隊官長分別旗幟隊伍講明號令督令兵勇逐日操演漸有改觀單內所開營制尙屬詳明整肅著俟新製旗幟鍋帳等件齊備後卽審擇地勢將安營結陣諸法加意講求俾各營將士

一律純熟以期悉成勁旅所有未盡事宜仍著該督隨時酌定俾營制益加周密應需軍餉卽著與崇厚籌商酌撥隨時奏聞前因張之萬奏請撥馬隊四五百名赴豫助剿當經諭令劉長佑將成保等所部馬隊酌撥數百名馳赴山東以便僧格林沁於得力馬隊內抽調數百名派員帶往豫省嗣因唐訓方奏稱臨淮蒙城危急苗捻鴟張復諭令僧格林沁將前調赴豫馬隊改撥赴皖並令添撥數百名於蘇克金恆齡二人中酌派一人帶往援皖尙未據該大臣具奏唐訓方兵單餉絕危迫萬狀勢難置之不顧劉長佑所請將馬隊暫緩抽調並商令僧格林沁將淄川營中得力馬隊與成保等所統馬隊互相撥換之處著俟僧格林沁奏到時再降諭旨將此由六百里諭令知之○諭劉長佑奏鄭魁士到營日期等語前任浙江提督鄭魁士在皖軍營時打仗尙稱勇敢惟係宣

花府回人平素性情桀驁多與統兵將帥不和遇事率多齟齬前經疊諭文煜崇厚飭令該員赴營勦賊均以病辭見復赴劉長佑軍營著劉長佑密行察看該員見在性情是否較前和平方行止是否安靜若令帶兵勦賊能否得力卽行據實密陳該督惟當不動聲色密加體察不可稍有洩露將此密諭知之○曾國藩彭玉麟奏查銅城牐旣克蕭慶衍劉連捷兩軍拔赴望城岡未及下寨賊卽擁眾過河成發翔侯賊半渡令各水營鈔過賊後賊方逡巡卻顧我舟師已橫截圩中萬礮齊轟斷其歸路成發翔等又分勇登陸四出痛勦賊酋蕭主將梟悍絕倫左營裨將李宏試縛而斬之羣賊奪氣我軍水陸交攻襲破二卡一壘壘中壘外積屍若阜罕有脫者望城岡旣紮定則巢縣之南賊無竄路陸師可薄城而營水師亦可繞湖而陣四月二十一日彭毓橘等軍卽移偪城根列

隊挑戰賊矢石交下我軍且卻且前相持竟日二更後水師環隱
猛擊悉焚湖中賊划毀其浮橋劉連捷亦自河南飛騎馳至共破
窯廟沿河六石壘賊向東門進城曾泗美喻俊明卽追入東門
成發翔等從南門攻入適鮑超亦派數營自廬郡西來遂克巢縣
二十三日鮑超由柘皋督軍出清溪鎮擊賊勝之略地而東蕭慶
衍截尾賊於林臺圩旋合劉連捷彭毓橘等營渡河前進於二十
四日與鮑超會師含山賊已宵遁鮑超等以賊去未遠星夜往襲
和州比入州境但見賊旗靡亂不絕於道水師成發翔約泊鍼魚
觜之楊占鼇駛入和州港內城賊逃遁不及半聚壘中鮑超蕭慶
衍與水師環壘急攻賊出壘乞降盡釋脅從者而斬其頭目以徇
各軍整隊入城含山和州同時克復從此進取江浦九洲或可
翦其枝葉圖拔金陵此次副將成發翔功績最偉應如何優加獎

勵之處恭候 聖裁其出力陣亡文武員弁謹分別開列懇請獎卹又奏查雨花臺石城據險雄峙屏蔽城垣守賊眾而且悍四月二十七日曾國荃督飭各軍先將聚寶門外四面石壘攻拔卽緊逼石城東草填濠架梯欲上賊然礮外擊趙三元率中軍親兵從礮臺下蟻附而升李臣典等各率部卒從中右兩路肉薄齊登維時敵樓火發賊方爭相奔救我軍已奪僞城一座餘賊棄壘竄遁蕭孚泗等縱軍圍剿將賊追逼長干橋蹙入水者無數曾國荃以雨花臺地段遼闊近接城圍賊必與我爭此要害乃抽四營駐守石城增修六壘以接各舊營之氣並調集後路各營以待城賊復出大股潛匿附郭房舍中以誘敵各軍俟賊少懈突出奮擊賊乃負創入城共計俘執二百餘名殲戮近六千人此次尤爲出力之總兵李臣典等謹先行開列奏請獎敘其餘出力人員可否附於

巢含和案內容臣開單保奏出自 天恩陣亡各員并查明另案

請卹又奏查南岸曾國荃一軍自克雨花臺石城及南門外各壘
後防兵愈單抽調金柱關守兵千人移紮金陵又調回彭毓橘一
軍回顧老營仍畱劉連捷步隊楊錢南馬隊隨同鮑超進攻江浦
九洑洲等處其蕪湖金柱關甯國灣沚西河東西梁山青陽南陵
池州一帶節節布置均尙穩固五月初三日太平石埭之賊分竄
茂林涇縣守將易開俊督隊迎剿殲斃盈千其竄江西之黃汶金
等股在鄱陽浮梁境內屢爲官軍所敗見在斜趨都昌湖口等屬
李榕一軍破賊於彭澤之項家山進搗湖口綜計饒州九江各屬
水路有劉于潯孫昌國左光培丁義方等營陸路有段起李榕席
寶田王沐韓進春等營而劉典又自徽州赴饒江忠義亦由湖南
赴潯水陸兵力會萃數萬當可驅賊出境不致深入腹地又奏苗

逆圍攻壽州四面築壘周以長濠城西濱淮一路環列礮船帆檣如織蔣凝學毛有銘援壽之師於四月二十七日進紮九里溝二十八日之戰雖破牛尾岡三壘而我軍傷亡頗眾未能得手臣已飛催成大吉由湖北迅赴三河尖援應西路並檄調周寬世由桐城迅赴六安分紮州城及謝埠馬頭集保蔣凝學等之後路又調見駐滬上之黃翼升帶淮揚水師船六七營由洪澤湖駛至五河以上埽清滄渦淮淝汝潁諸巨川俾苗逆不得盡收水濱之利惟壽州城中僅五百飢疲之卒無升斗續進之糧累月苦守危在旦夕赴援之陸師既不能併力衝入續調之水師又不能剋期來會誠恐要地難保無以慰該知州毛維翼倒懸之望憂灼之餘彌增愧歉 上諭巢縣克復之後連復含山和州疊下三城從此即可進取江浦九洑洲以剪賊之枝葉圖拔金陵雨花臺及金陵南門

外各石壘之賊據險負隅以爲堅城屏蔽復經曾國荃力戰下之不特可分蘇杭賊勢卽金陵賊巢勢亦日蹙氣機甚好卽著曾國藩與曾國荃督飭鮑超蕭慶衍等軍於南北兩岸相機進取和含之賊殲渠釋從是否尙有餘匪潛往他處抑卽向江浦九洲等處竄逃江北裏下河一帶久爲賊所垂涎尤恐敗殘餘黨欲向裏下河等處就食致滋竄擾著都興阿富明阿隨時督率各軍嚴密巡防雨花臺地段遼闊曾國荃增築新壘布置均妥其忠逆李秀城見在何處是否卽在金陵城內其回援蘇州及直犯裏下河均不可不嚴爲之備如果江浦九洲卽能攻克則賊眾渡江之路可期斷絕而金陵益成檻阱之勢剿除自更易得手苗逆兇狡甚張壽州蒙城被困危在旦夕曾國藩檄調成大吉周寬世等軍分路援應並派黃翼升水師由洪澤湖入淮著卽飛催前進水陸併

力合攻以解壽州之圍唐訓方所部各軍搢持非易曾國藩兼轄皖省責無旁貸此時髮逆均已竄回江南惟有分得力之軍勦辦苗練與唐訓方所部聯絡策應以保全局是爲至要其蒙城危急情形能否稍紓及懷遠進攻如何均著唐訓方隨時奏聞以紓廑系將此由六百里各諭令知之○諭勞崇光奏繞道由川入黔中途擊敗髮逆並查明正安州官貪役肆辦情形各一摺勞崇光甫抵綏陽卽爲石逆餘黨阻遏該督倉卒號召分投部勒遂能以少擊眾痛挫兇鋒實堪嘉許此股竄匪見經田興恕沈宏富等擊敗屯聚南坪一帶復欲由黔竄蜀正宜乘勝跟追亟圖殲滅勞崇光以田興恕係奉旨赴川差遣之員飭令帶兵二千跟蹤追擊順道入川惟田興恕殺害教民一案前已寄諭勞崇光張亮基迅速在黔辦結毋庸飭赴川省如該革員業已入川仍由崇實等押令

赴黔該督此次調派自係尙未接奉寄諭仍著該督等迅將田興
恕調回聽候查辦勞崇光並卽趕緊馳赴省垣會同張亮基將教
民等案迅速辦結毋少遲延其南坪髮逆仍著調派得力官兵實
力追剿就地殲除至正安官役橫徵暴斂及弁勇妄殺殘激民變
各情貪暴兇橫實駭物聽該督甫入黔境尙未接補授雲貴總督
之命卽能不嫌越俎遇事畱心並將妄行慘殺之弁目劉元標等
立卽正法輿情翕然辦理甚爲妥協見在該督身任兼圻地方吏
治尤屬責無旁貸所有加徵苛斂及輕聽釀變之署州牧陳鏞李
咸中二員卽著會同張亮基提省嚴訊切實懲辦無稍姑容其差
役李萬等並卽飭令樊希棟按名拏獲就地正法以快人心而肅
吏治將此由五百里各諭令知之○飭英桂籌撥甯夏滿營兵餉
○劉長佑奏請畱蘆鹽復價並酌撥釐捐濟餉允之○予安徽陣

臣等本日已明降諭旨授毛鴻賓爲兩廣總督接奉此旨計不日即可馳赴新任粵東係財賦之區餉源所出洋務釐務軍務頭緒紛繁關繫緊要該督任大責重不可無相助爲理之人黃贊湯自簡任巡撫以來尙未見有所設施其人近於巧滑一流而毀譽參半著該督於到任後畱心察看黃贊湯是否能實心任事若令久於其任能否得力據實密奏將此密諭知之○諭徐之銘等奏迤西髮逆踞富民等州縣並竄踞祿豐等屬及楚雄普洱兩府城見派兵練克復地方肅清又勦辦巧家廳大股髮逆克復廳城摺二件覽其所奏無非任意鋪張專爲保員起見勞崇光前已簡授雲貴總督賈洪詔前已簡授雲南巡撫均屬責無旁貸著將楚雄等府州縣失陷情形及已否克復各該員等是否在事出力據實

查明具奏死事各官紳人等一併查明奏請分別旌卹徐之銘另奏請將署普洱府知府夏家疇等獎勵各片並著勞崇光等查明該員等是否實有勞績應否予獎之處據實具奏又密保馬如龍岑毓英片二件並著詳查密奏妥籌辦理摺片七件均著發交勞崇光賈洪詔閱看另片奏請飭張亮基將收過銅鉛變價及捐輸銀兩解滇等語著該署撫仍遵前旨將收存各款解赴雲南交賈洪詔備用以資接濟又片奏請將提督印信送滇交馬如龍署理等語雲南提督已簡放福陞該員見在昭通著卽將雲南提督印信派員齎送昭通交福陞祇領以重職守又片奏據張亮基來咨鈔錄具奏貴州興義府屬回夷肆擾抵黔後相機籌辦等情此係參徐之銘之件該署撫尙未查辦何以先行鈔咨殊不可解是否徐之銘由探訪而得抑係該署撫鈔咨著張亮基據實具奏見在

興義府屬是否有回夷滋擾並著勞崇光張亮基確查情形奏聞
原片三件著發給張亮基閱看賈洪詔放雲南巡撫已逾兩月何
以尙無奏報到京該撫見在何處著勞崇光催令迅赴昭通東川
一帶妥籌辦法其昭通東川一帶應如何添兵布置爲先事綢繆
之計並著勞崇光賈洪詔會同籌辦仍將滇省情形隨時具奏毋
稍懈玩將此由六百里各諭令知之尋奏徐之銘派令回目前往
興義辦撫當遵旨會同前總督潘鐸設法截回嗣回匪襲踞府城
據實覆奏因密咨潘鐸查照不意滇省被襲潘鐸被害遂爲徐之
銘所得並非另有鈔咨至回匪勾結夷匪滋擾興義疊陷各州縣
城見已督率兵勇迅圖收復報聞○命各省督撫考覈捐納人員
○諭順天府嚴緝近畿騎馬賊匪○飭催甯夏各項生息銀兩○
已革雲南巡撫徐之銘奏滙陳地方情形得旨徐之銘當懷遵前

旨迅卽來京聽候部議本日所奏各摺片已發交勞崇光賈洪詔
分別覈辦至密保馬如龍岑毓英二員如果辦事出力始終勤奮
勞崇光等秉公覆覈亦必不沒其勞奏請擢用也○命晏端書來
京以毛鴻賓爲兩廣總督惲世臨爲湖南巡撫調石贊清爲湖南
布政使以王榕吉爲直隸布政使調李鶴年爲直隸按察使以王
正誼署河南按察使

由記名
道署

○丁卯僧格林沁國瑞奏前因直東

賊氛未靖各處伏莽甚多若不先清畿疆誠恐大軍一經赴皖北
路之匪乘隙句結又肆蔓延勢難兼顧是以屢次陳奏諒已仰蒙

聖鑒至

臣

等所帶馬隊得力者不過三千每值出隊除去患病

受傷又僅得二千餘名從前剿捻每值全隊雖一二萬馬步賊匪
尙能制勝每值分隊雖萬餘或數千馬步賊匪難期必克況苗逆
異常狡獪與捻匪動作不同雖全隊合力迎剿勝負之機尙難確

有把握若再分撥皖豫或調換他隊實未可輕率應敵目下皖北軍務較之東省緊急臣等曷敢再事遲疑致獲避重就輕之議若不奏明情形卽刻南下又難釋北顧之憂合無仰懇 天恩飭下議政王軍機大臣速議具奏如北路可保無虞自應剋期南征臣等將北路之蘇克金恆齡等馬隊及駐紮曲阜鄒縣之舒通額等軍調齊卽行啟程其直東之宋憬詩應勦應撫由直隸督臣劉長佑酌量調度淄川白蓮池踞匪交山東撫臣閻敬銘辦理至京營馬隊若責令副都統成保帶領以之彈壓地方緝捕餘匪或可得力如交臣等帶赴皖境使其身經強敵實難制勝隨軍教演亦非一時可成精銳佐領訥莫津等所帶馬勇四百餘名業經紮畱宿州防剿矣統俟奉到諭旨卽行全軍南下力圖會剿 上諭議政王軍機大臣等前因張之萬奏河南急需馬隊諭令僧格林沁酌

撥數百名赴豫並因唐訓方奏蒙城四面受敵情形危殆當以僧
格林沁一軍攻勦淄川踞匪未能剋日南下諭令分撥一旅迅速
赴援茲據奏稱直東賊氛未靖各處伏莽甚多若不先清畿輔恐
大軍赴皖北路之明賊暗匪乘隙勾結彼時再分隊回援則兩處
兵力均形單薄勢難兼顧所部馬隊得力者僅二千餘名實未便
抽撥各等語所奏自係實在情形淄川功在垂成勢難中止而此
外尙有不法降賊亦須僧格林沁會同劉長佑等協力兜勦且督
勦白蓮池教匪正當喫緊該大臣自應將積年巨愆逐一殲除俾
北路可保無虞方可督兵南下至馬隊數止二千有餘若再分撥
皖豫恐彼此均不得力著卽照所請暫緩調撥該大臣惟當專力
勦辦東省各匪俟淄川及降賊等股匪均就削平然後再行返旆
南征庶免後顧之慮壽州被圍甚急昨據曾國藩奏蔣凝學毛有

銘援師進紮九里溝連破牛尾岡三壘軍士傷亡甚多該大臣見已飛催成大吉迅赴三河尖援應檄飭周寬世馳赴六安分紮州城等處並調派駐滬之黃翼升督帶淮揚舟師駛至五河以上埽清漕溝淮肥等處匪船布置甚屬周妥此時僧格林沁之兵旣一時未能南下卽著責成曾國藩嚴飭水陸諸軍星速前進會同蔣凝學等併力衝入壽城以拯倒懸之危蒙邑城外賊壘甚多馬新貽等雖能竭力守禦而兵單餉絀危迫萬分著唐訓方設法兼顧其撥兵濟餉各事並著隨時會商曾國藩吳棠毋稍貽誤皖豫脅齒相依臨淮與蒙城情形如此窘迫張之萬等豈容坐視著恪遵前旨將應解臨淮餉銀迅速撥解並著與袁甲三籌商由陳郡勸捐糧石運赴蒙城藉資接濟仍隨時整頓營壘激勵團練嚴防苗逆乘間西竄無稍疏虞淄川踞匪勢窮思竄疊經僧格林沁督率

官軍截殺殆盡仍著嚴飭各路兵勇晝夜環攻迅圖克復逆首劉德培既有結黨很撲竄赴青州府之謀並著閻敬銘密飭青州文武員弁將曾經解散之快役團嚴密查拏毋令內應爲患雷鳳鳴以失律伏誅其降眾亦分別遣散辦理甚爲妥善其餘尙有在僧格林沁及劉長佑兩處軍營者均應似此不動聲色乘機剪除仍著僧格林沁劉長佑會籌妥辦謀定後動毋得漏洩風聲致有貽誤將此由六百里各諭令知之○以勦辦山東教匪功賞陳國瑞黃馬桂○予明臣方孝孺從祀 文廟○戊辰金星晝見○諭內閣前因內閣侍讀學士鍾佩賢奏左都御史載齡參劾科道單銜具奏是否並未商及同官所參能否允當當經諭令都察院堂官明白回奏茲據單懋謙等奏稱載齡此次參劾科道並未與該堂官等會商無從列銜至所劾鳳寶各員均非無因卽著毋庸置議

惟各部院堂官甄別屬員向皆公商會銜具奏原以杜專擅而重考察矧都察院爲風憲之官科道各有言事之責黜陟考覈尤宜審慎載齡此次甄別各員並不商及同官輒竟單銜具奏雖非專恣亦屬輕率殊於體制未協載齡著交部議處嗣後各部院堂官於本署應行條奏事務以及舉劾所屬官員務當公同認真覈議如事理確鑿而各堂官意見不合者准其單銜具奏仍於摺內聲明以符定例至都察院科道各員尤宜委用得人方能無忝厥職嗣後仍著該堂官分別考覈如有聲名平常庸劣不職之員仍當隨時甄別其平日品行端方辦公勤奮者亦卽酌量保薦不得以載齡業經議處遂於該衙門科道中賢否一併緘默不言也○諭議政王軍機大臣等總理各國事務衙門奏中國自置火輪兵船將抵海口所有添買軍裝器械預籌月支經費在各海關分撥並

酌定節制章程一摺據稱此項輪船除前撥過銀八十萬兩外並在英國借銀十五萬兩在上海借銀十二萬兩共計需銀一百零七萬兩又應支糧餉軍火等項一切用款每月統給銀七萬五千兩均經該衙門向李泰國再四撥詰酌定章程及由中國選派武職大員作爲該師船之漢總統所延外國人阿思本作爲幫同總統以四年爲定用兵地方聽督撫節制調遣阿思本由總理衙門發給札諭俾有管帶之權隨時挑選中國人上船學習各等語著卽照議辦理此項輪船駛抵海口後卽著曾國藩李鴻章節制調遣並著派令武職大員作爲漢總統會同辦理其前所擬之蔡國祥如能勝任著卽責令統帶以資得力其如何駕馭之法總須一切調度機宜事權悉由中國主持方爲妥善至中國人上船學習駕駛礮位等事總期迅速諳練該督等前奏配用楚勇當已豫爲

派定卽著飭令蔡國祥隨時督率學習此項輪船見在自以先剿金陵等處髮逆爲要賊平之後卽可以爲巡緝私販之用無論如何用法總須俾中國人熟習駕駛收其利益斷不可日久仍爲外國人所主持其月餉等項銀兩官文曾國藩李鴻章務須按期支給不可絲毫短少拖欠致令有所藉口總理衙門原摺及照錄見議章程五條均著鈔給閱看將此由六百里各諭令知之○己巳曾國藩李鴻章奏查江蘇蘇松太浮賦上湖之則比元多三倍比宋多七倍旁證之則比毗連之常州多三倍比同省之鎮江等府多四五倍比他省多一二十倍不等其弊由於沿襲前代官田租額而賦額遂不平也宋時籍蔡京韓侂冑等莊爲官田又賈似道廣公田元代續加官田明初平張士誠又沒入諸豪族田皆據租籍收糧嘉靖中復令各州縣盡招境內官田民田分攤定額長洲

縣官田最多故額最重他縣他郡官田遞少故額遞輕今長洲等縣每畝科平米三斗七升以次不等折實粳米多者幾及三斗少者一斗五六升遠過律載官田之數此蘇松太重賦之源流也我朝承平日久海內殷富爲曠古所罕有故乾隆中年以後辦全漕者數十年無他民富故也至道光癸未大水元氣頓耗然猶勉強枝梧者十年迨癸巳大水而後無歲不荒無縣不緩以國家蠲減曠典遂爲年例部臣職在守法自宜堅持不減之名疆臣職在安民不得不爲暗減之術始行之者前督臣陶澍前撫臣林則徐揣其意必謂減額則永不能加災緩則後不爲例原冀民氣漸甦無難復舊初不意年復一年且年甚一年而不可返也又官墊民欠一款其所謂墊者豈州縣之果能墊哉不過移雜墊正移緩墊急移新墊舊移銀墊米以官中之錢完官中之糧將來或豁免或攤

賠同歸無著猶之未完也故歷年糧冊必除去墊欠虛數方得徵收實數以此數民固未嘗完也伏查蘇屬全漕一百六十萬厥後積漸減損今試以道光十一年起至咸豐十年止三十年中運數分計之辛卯以後十年共一千三百餘萬內除官墊民欠得正額之七八成辛丑以後十年共九百餘萬內除官墊民欠得正額之五六成咸豐辛亥以後十年共七百餘萬內除官墊民欠得正額之四成而已白粵逆竄陷蘇常焚燒殺掠慘不可言臣鴻章親歷新復各州縣向時著名市鎮全成焦土連阡累陌一片荆榛凡田一年不耕便爲荒田今已三年矣各廳縣冊報拋荒者居三分之一雖窮鄉僻壤亦復人煙寥落遇有居民無不鵠面鳩形奄奄待斃已復之松太如此未復之蘇州可知而欲責以重賦責以數倍他處之重賦亦無骨可敲無髓可吸矣臣等細覈歷年糧數咸豐

十年中百萬以上者僅一年八十萬以上者六年而皆有官墊民欠十餘萬在其中是最多之年民完實數不過九十萬成案如是民力如是大難之餘催科尤形棘手又查順治八年三月奉 上諭凡故明仇怨地方或一處加糧甚重我朝並無仇怨何可踵行此等情由詳察具奏雍正三年三月十九日怡親王奉請酌減蘇松浮糧奉 旨蘇松之浮糧當日部臣從未陳奏常廬 皇考聖懷屢欲施恩議減今怡親王等悉心籌畫斟酌奏請朕體 皇考愛民寬賦之盛心准將蘇州府額徵銀蠲免三十萬兩松江府十五萬兩乾隆二年奉 上諭江省糧額尙有浮多之處著再加恩免徵銀二十萬兩部文照雍正三年例辦理仰惟 列祖 列宗當東南全盛之時猶復軫念民依如此其深且厚況今日之兵燹予遺流離瑣尾至於此極漕糧爲惟正之供而松蘇獨曰浮糧曰

浮賦見諸 列聖諭旨及郡縣志書不以爲嫌是知實有浮多應減之處畱以待我 皇太后 皇上行之者也惟有籲懇 聖恩鑒察特沛殊恩俯准減定蘇松太三屬糧額由 臣等督飭司道設局分別查明各州縣情形以咸豐中較多之七年爲準折衷定數總期與舊額本輕毋庸議減之常額二屬通融覈計仍將每年起運交倉漕白正耗米一百萬石以下九十萬石以上著爲定額卽以此後開徵之年爲始永遠遵行不准更有墊完民欠名目似此覈實辦理不特酌十年二十年之通相較固無所絀卽酌三十年之通相去亦不甚遠至官墊民欠本屬弊政必宜永遠禁止又嗣後非大旱大水實在荒歉者不准捏災著爲令伏願 皇太后皇上俯念蘇松各屬爲十八省未有之重賦非他處被陷州縣可比又爲數百年未有之大難非歷年被災例案可比去無益之空

籍求有著之實徵民生幸甚國計幸甚如蒙俞允俟蘇屬肅清一體辦理先自松太冊行由臣等設局擬定章程以昭覈實又奏查蘇松漕糧積弊視他省爲甚其最不公平者莫如大小戶之分蓋州縣徵收錢糧皆有折色平餘世家大族卽以正供定額與州縣相持於是一切攤之民戶惟所誅求漫無限制因有大小戶之名一以貴賤強弱定錢糧收數之多寡推原其故皆由錢糧額徵過重激成大戶把持而迫州縣剝削小民積習相沿竟無善全之術目下當以覈減浮糧爲理漕之綱以辦理均賦爲治漕之用除去大小戶名目使州縣不得意爲高下而後浮收之弊乃可次第清釐臣查錢糧浮收自嘉慶以後漸次加增其時州縣之殷富已漸不如從前而浮收反爲重者則以彌補州縣虧空定爲攤賠之例挪東掩西弊端百出一切取償於錢糧各管上司知其弊而無能

禁制又運糧之旗丁收漕之倉書互相需索年甚一年其始因浮收而有浮費其後浮費日增浮收亦遂習爲固然日求取盈無上下相恤之意故臣以爲蘇松漕糧覈減後必以革除大小戶名目爲清釐浮收之原以裁減陋規爲禁止浮收之委如蒙 天恩俯准將蘇松浮糧酌中定額 臣卽督飭司道等設局清查隨各州縣風土人情之宜明立章程酌定折價紳衿平民一例完納永遠革除大小戶名目不使州縣陵虐小民敢爲箕斂而不顧亦不使各項陋規困苦州縣迫使病民而不辭 上諭內閣節據曾國藩李鴻章等奏報克復松江府及太倉州地方陳及該處百姓被賊殘虐爲數百年來所未有各廳州縣田畝拋荒著名市鎮悉成焦土雖窮鄉僻壤亦復人煙寥落連阡累陌一片荆榛居民間有子遺顛連窮困之狀有不能殫述者覽奏情形曷勝憫惻因思蘇松太

三屬地方爲東南財賦之區繁庶甲於天下而賦額亦爲天下重比諸他省有多至一二十倍者良由沿襲前代官田租額且自宋明兩代籍沒諸田皆據租籍收糧所致嘉靖中又令各州縣盡括境內官田民田分攤定額蘇松等屬田賦至比官田通額亦皆大有增加我朝順治年間卽經明奉 聖諭以故明仇怨地方加糧甚重我朝何可踵行飭由地方詳察具奏嗣於雍正乾隆年間疊奉 恩旨以蘇松浮糧施恩議減將蘇州府額徵銀蠲免三十萬兩松江府十五萬兩又江省糧額浮多之處加恩免徵銀二十萬兩仰見我 祖宗軫念民艱至深且厚國家承平百餘年來海內殷富江蘇自乾隆間辦理全漕者數十年固由民力之充亦屬民心之厚及道光年間兩次大水以後各州縣每歲荒歉加恩蠲減遂成年例嗣是每年徵收之數內除官墊民欠率得正額之七

八成或四五六成不等民力殆已難堪及至粵逆竄陷該省焚毀殺掠民盡倒懸幸自上年官軍克復太倉見方飭令統兵大臣等進取蘇州救吾民於水火而各地方經賊荼毒彫瘵至極若不將各該府州屬數百年來浮糧積弊仰體 列聖深仁厚澤大爲覈減無論民力斷有不堪即使勉強減成輸納何以慰如傷之隱而施浩蕩之仁且令官紳胥吏徒營中飽尤爲弊之甚者亟宜因此時會痛加埽除所有蘇州松江太倉三府州縣糧額著兩江總督曾國藩江蘇巡撫李鴻章督飭司道設局分別查明各州縣情形折衷議減總期與舊額本輕毋庸議減之常州鎮江二府通融覈計著爲定額先自松太創行卽以此後開徵之年爲始永遠遵行不准再有墊完民欠名目蘇州所屬俟肅清後一體辦理嗣後非大水旱成災實在荒歉者並不准捏災請緩請蠲至蘇松漕弊尤

莫如大小戶等名目紳戶把持州縣浮收種種弊竇皆出其中著
卽永遠禁革所有一切辦理章程及應行裁革之浮收漏規包戶
等積弊均著該督撫悉心妥籌詳細具奏務期上紓國用下恤民
生變通盡利經久可行用副朝廷惻痌在抱嘉惠斯民至意○曾
國藩奏見在髮捻紛乘苗練復叛軍情反覆祇貽宵旰之憂每與
臣弟國荃寓書做惕本年二月至雨花臺大營與臣弟共處八日
慨兵事之方殷感主恩之極渥中夜奮興互相誠勉臣弟前擢

藩司已叨非分今又特沛恩綸授以開府之榮專其治軍之責聞
命而後已閱兼旬與臣弟兩次函商欲固辭則頗涉矯情欲受事
則不自量力惟有籲懇天恩收回成命俯准臣弟以開缺藩司
效力行間與臣熟籌戰守或者以勤補拙以恐致福迅克堅城殄
除醜類稍答高厚鴻慈於萬一上諭曾國荃自統師南下以

來疊復沿江名城要隘駐軍雨花臺連破逆壘與彭玉麟鮑超等
水陸諸軍爲規取金陵之計朝廷以曾國荃勳績卓著擢授浙江
巡撫並令仍統前敵之軍駐紮雨花臺一意進取論功行賞國家
自有權衡茲覽該大臣及該撫所奏深以金陵未復兵頓堅城而
該大臣兄弟異數頻邀旣榮授以封圻復令駐軍江南遙領疆寄
深虞隕越弗克負荷在該大臣等受寵若驚固辭恩命洵屬至誠
而朝廷懋賞懋官權衡悉當見在軍事方亟時局孔艱凡在臣工
正宜黽勉效忠共期宏濟該大臣惟當督率曾國荃忠誠報國以
副委任正不必瀆辭朝命也○諭曾國藩奏藩司自陳辦公竭蹶
據情代奏請開缺畱皖等語江蘇布政使萬啟琛節經曾國藩奏
保辦事得力是以疊加升擢畀以監司之任正當竭力報稱何得
自陳竭蹶以博退讓之名該督所請萬啟琛開缺之處著毋庸議

○諭議政王軍機大臣等曾國藩奏爲伊弟國荃懇辭巡撫恩命及代陳萬啟琛懇辭藩司曾國荃奏懇請收回成命專辦軍務各摺片又李鴻章奏調派各軍分路堵剿見籌進規蘇郡情形一摺覽曾國藩兄弟所奏感激恩數互相誠勉實屬發於至誠惟朝廷懋官懋賞當此艱難宏濟之時尤貴因材器使曾國藩等總當一意進取以奏膚功其母固辭萬啟琛見有經手事件曾國藩可令其仍畱皖營其蘇藩一缺卽暫時揀員署理亦無不可李鴻章所奏克復新崑乘勝進規蘇城所籌三可慮二可幸等情及調派程學啟李鶴章李朝斌等各軍分路以剿爲堵並防內竄均極妥協卽著督飭程學啟李鶴章等穩進以圖萬全戈登常勝等軍遊擊之師尤宜妥爲調度策應江南浙滬各軍日圖進取曾國藩前奏克復巢縣後見擬進攻江浦及九洑洲之賊諒南岸竄匪不得復

行偷渡其另股竄至天長揚州之賊多半飢疲著都興阿富明阿
吳棠等督率諸軍竭力堵守勿使竄入襄下河一帶肆擾曾國藩
督令鮑超等軍速克二浦絕賊過江之路則南北岸之賊勢成中
斷各軍分投剿辦當必所向較易爲力也將此由六百里各諭令
知之○諭聞敬銘奏滙陳溜克喫重情形一摺溜營兵勇散漫無
紀惟仗僧格林沁聲威懾伏匪勢不敢鴟張刻下連營合圍已有
端倪若移師他往不免功敗垂成且僧格林沁前赴東昌必須將
見住曲鄒之舒通額一軍調往該隊專防白蓮池北路一經抽撤
必致空虛該撫所籌係屬實在情形自應將僧格林沁仍畱溜川
督剿以期迅速蕲功其丁寶楨一軍並卽飭令馳赴東昌會同恆
齡等軍併力剿辦務期聚而殲旃勿令竄逸爲患溜營前敵兵力
尙單仍著閻敬銘與僧格林沁悉心籌商添撥勁旅以利攻剿將

此由六百里諭令知之○諭官文奏李桓病難速痊見令所部西
行歸梁作楫調遣及嚴樹森奏親赴安麻黃德等處察看布置暫
回省垣各摺片陝省軍務喫緊官文等將李桓所部勇丁一千餘
名籌備軍儲已令原派營哨各官拔隊遄行馳赴興安暫歸道員
梁作楫統率著卽飭令梁作楫相機調遣併力進剿李雲麟經此
次飭催亦必當奮發忠義墨經赴軍惟計行抵陝南尙需時日李
桓如能速痊仍著官文等飭催赴陝毋稍稽遲嚴樹森所奏布置
各情尙屬周妥此時豫東防務較鬆而北與豫南毗連各處當茲
正息一帶豫捻復熾著卽嚴飭總兵穆正春等於黃安羅山交界
等處力籌防剿並與豫軍隨時聯絡以資策應毋任竄突將此由
六百里諭令知之○諭毛鴻賓奏剿辦土匪防剿黔匪一摺見在
辰沅界內漸臻安謐匪首張芝蘭是否業經殲斃或先已逃遁著

毛鴻賓惲世臨確切查明母任該逆漏網辰溪等處餘匪並著督飭辰州府知府鄂堃等認真搜捕務絕根株黔省匪勢鴟張張家寨教匪分三股出巢圖竄銅郡荆竹園教匪仍踞黃坪莊趨向未定黎平積匪羅光明勾結播揚所洪州所各匪聲言借路前往湖南鎮遠府屬匪首包毛仙聚眾擾至泰坪營黔省下游各府幾於無處非賊湖南邊界防不勝防若非會合湘黔兩省兵勇併力夾擊實屬不敷剿辦著張亮基辦理貴州本省軍務尤屬責無旁軍次第剿辦迅掃逆氛張亮基辦理貴州本省軍務尤屬責無旁貸毋得專待湘省援軍坐失機宜據毛鴻賓奏從前黔省軍務流弊在於緊急之日則迫切呼援迄楚師出境剿辦得手又急於招撫苟圖近功旋撫旋叛仍旋叛旋撫如上年招降張家寨匪首據該省地方官稟稱似屬可靠而接閱各營來稟則皆斷其必不可

將止以隔省用兵不能堅持主勦之議今果與荆竹圍合股大肆
狡猾張亮基在滇黔年久洞悉情形請飭實力籌勦等語著張亮
基揀派勁旅迅赴貴東痛加掃蕩務爲一勞永逸之計毋蹈從前
覆轍毛鴻賓交卸後憚世臨於一切防勦機宜務當慎之又慎毋
得稍有疏虞致負委任該撫經朝廷不次超擢想自能力圖報效
也毛鴻賓另片奏金國琛積勞成疾稟請寬給假期等語金國琛
打仗素稱勇往見在河南帶兵乏人亟盼該員前往著毛鴻賓憚
世臨催令金國琛趕緊療治俟病體稍愈卽飭迅速赴豫李續宜
病勢增重朝廷甚深廕系如能速就痊可並著趕緊起程馳赴皖
營浙江鹽運使朱孫詒見在是否尙在湖南著該撫查明具奏將
此由六百里各諭令知之○諭玉通奏花寺回教勾結撒匪逼近
郡城請派員勦辦一摺西甯花寺回教與臨洮舊教積不相能該

回民總約馬歸源暗聚花寺回子數千於三月初九日將東關北古城北關一帶洮教回子殺傷過半大肆焚搶其丹噶爾南川營等處花寺回子復勾結撒拉並米拉溝奸回各數千之眾燒殺洮教及漢民各村莊並攻撲丹噶爾廳城擊傷官兵逆燄極爲兇狡玉通見調青海部落蒙古番子將撒匪擊退丹圍已解而鎮海堡多巴等處經撤回經過擄掠一空見在兩教互相仇殺擾害漢民盤踞近郊城池戒嚴而撒匪未受懲創勢必勾合復來以圖報復且甘省逆回見尙滋擾若西甯回眾撒匪再復鳴張勢將不可收拾著恩麟迅卽調派勁兵交見駐蘭州幫辦防剿之前任提督經文岱統帶前赴西甯迅籌勦辦如經文岱未克分身前往卽著恩麟恩麟妥速籌商另派大員帶兵馳往會剿以顧邊陲玉通見任西甯辦事大臣責無旁貸務卽飭調該處防兵及所調蒙古青海

等兵分別籌勦解脅殲渠無得專待援師致滋貽誤本日復據奎英等奏喀什噶爾兵餉不敷甚鉅見經伯克回子抒忱捐輸等情該城伯克回子雖屬踴躍急公惟官兵月餉僅恃勸捐接濟豈能經久且恐民力已竭官吏仍行勒派流弊滋多著熙麟恩麟迅將該省應解該城兵餉卽籌撥解免滋擾累又據興泰等奏巴里坤餉缺已遵旨於哈密經費銀內提撥銀三千兩請飭陝甘督臣籌解歸款等語著熙麟恩麟先行籌撥銀數千兩解交哈密歸款以資協濟將此由五百里諭知熙麟玉通並傳諭恩麟知之○諭常清奏回人滋事見將首從逆犯拏獲及續辦情形並請將文祥調補巴燕岱領隊大臣各一摺伊犁惠遠城之三道河地方回民懷疑起事勾結塔爾奇營回人扭鎖開城搶劫庫存軍械殺斃兵丁經常清派員緝捕先後生擒首從各犯百餘名並將逆首楊三腥

及飛刀馬二等凌遲處死該將軍見調錫伯索倫等營官兵會同惠遠城官兵分紮東西北三門巡查守禦惠城見已安堵其巴燕岱地方亦派圖庫爾兵防守並飭錫拉那等前往安撫商民查收器械辦理甚爲妥協惟回性多疑近因陝甘逆回被勦心懷疑懼並有關內奸回潛赴伊犁煽惑之事該處回民聚處甚多設被勾連紛紛起事邊疆重地關繫非輕著常清督飭該員弁等隨時嚴密巡查以杜煽惑並一面剴切出示諭以陝甘逆回實因叛逆昭著應行勦辦朝廷止分良莠不分漢回斷無玉石俱焚之理務使該處漢回兩不猜疑各安生業以靖邊徼至巴燕岱滿營事務殷繁漢回雜處該將軍請以文祥調補該處惟文祥前已補授哈密辦事大臣且近有查辦緊要事件已令迅赴新任所有巴燕岱領隊大臣一缺仍著常清另揀賢員先行署理將此諭令知之○李

鴻章奏查蘇常杭嘉爲東南財賦最盛之區逆眾占踞四年派糧收稅取精用宏且時以財粟接濟金陵轉輸各路金陵是其老巢而蘇常杭嘉又爲金陵根本賊必死守力爭以護寇糧此其可慮者一也江南多水蘇嘉各郡尤甚湖河蕩港千百通聯津路迷離橋梁斷續戰船有不能徧及之處陸軍有望洋而歎之時我難進而賊易守不比中原四戰之地山川瘠苦之邦克一名城則各城之賊望風而走前此常熟解圍太崑疊克蘇嘉之賊亦未嘗不膽寒然猶死力抗拒蓋恃地勢之險足以自固又念資財之厚不肯遽棄臣由松滬進兵若蘇嘉並圖則無此兵力舍嘉圖蘇則動輒牽掣此其可慮者二也僞忠王李秀城爲諸賊之冠踞有蘇杭嘉湖四郡之地其餘各僞王皆其死黨咸豐十年圖解金陵圍困繞竄浙江十一年圖救安慶繞竄江西湖北去年迄今圖救金陵分

竄皖江南北又欲繞竄揚州裏下河以取遠勢此時我軍進偏蘇州若攻勦過急則或挈眾來援或另圖竄踞均屬意中之事此其可慮者三也惟是江皖浙東各有重兵堵截鮑超與曾國荃所派各軍連復巢縣含和已偏至江浦浦口其另股竄至天長揚州者飢疲實甚都興阿吳棠等果能竭力堵守不使竄入裏下河鮑超等再速克二浦扼斷北賊過江之路則各軍分投勦辦較易收拾此其可幸者一也李秀城李侍賢分踞蘇浙自見挫於官軍各路損傷不下數十萬其精銳已不甚多各軍攻奪不下數十城其膏腴亦去其半蘇浙各賊惟嘉興陳炳汶一股較多而悍見有蔣益澧扼其前臣軍綴其後常州無錫直接金陵東壩賊援甚廣深入艱難但使我軍穩進得寸得尺毋再失機亦可徐圖制敵此其可幸者二也臣軍水陸添募及收撫各城降眾已踰四萬督臣曾國

藩以蘇郡可圖太湖可進又派總兵李朝斌統率太湖水師十營
剋日下駛見擬由崑山進蘇州爲一路以程學啟所部陸軍當之
由常熟進江陰無錫爲一路以李鶴章劉銘傳所部陸營當之提
臣黃翼升督帶淮揚水師各營往來調度常勝軍移紮崑山專備
各路援應由泖澱湖進吳江平望太湖爲一路李朝斌水師當之
以上三路皆欲規取遠勢以翦蘇州枝葉而後圖其根本又恐分
路並進杭嘉湖各賊繞竄浦東窺撲松滬復派遣員潘鼎新帶所
部八營扼紮金山衛編修劉秉璋帶所部七營扼紮洙涇副將楊
鼎勳帶所部五營扼紮張堰以防內竄俟浙軍得手卽相機前後
夾勦據程學啟稟稱該總兵在陽澄湖迎擊賊船擒馘千餘仍卽
日移營大小官塘及外跨塘一帶李鶴章稟稱業將常熟駱國忠
降眾編立八營分置防勦並會各軍進紮常熟西三十里之王莊

探明前面賊營由顧山至無錫城外連互不絕係偽漳王偽潮王
偽侍王帶領賊眾六七萬希圖抵禦擬併力兜擊再與黃翼升劉
銘傳等規復江陰又據常勝軍稟稱已雇齊小輪船或協攻吳江
或協剿無錫冀斷各賊援蘇之路臣惟有密飭諸將穩慎以圖互
相援救以固全局報聞○引見四品卿銜前任閩浙總督劉韻珂
得旨著以三品京堂候補○賞降調河南巡撫鄭元善知府發往
山東軍營交署巡撫閻敬銘差委○庚午予杭州陣亡副將吳盡
臣縣丞龍章等祭葬世職○辛未調毛昶熙爲吏部右侍郎轉龐
鍾璐爲禮部左侍郎調吳存義爲禮部右侍郎以薛煥爲工部右
侍郎前江蘇巡撫○壬申諭議政王軍機大臣等都興阿富明阿奏楚
軍攻克二浦及七里九汊等洲富明阿親赴靖江察看難民各摺
片都興阿自奏舊疾舉發請開缺離營調理一摺曾國藩前奏鮑

超等軍追賊已至江浦飭令攻克二浦後卽進攻九洲茲據都興阿等所奏江浦浦口已於本月初九日攻破七里洲於十二日攻破九洲於十五日攻破九洲爲江中要地賊踞堅壘數年之久官軍此次攻克竟能敏速如此都興阿等所奏諒係實情曾國藩奏報是否業已在途著卽將詳細情形迅卽馳奏都興阿等摺內所稱忠逆帶隊渡江援浦爲梁正源截擊於寶塔根賊遂敗竄見在竄往何處下關七里洲之賊向中關回遁其九洲踞賊斃溺而外是否尙有餘匪紛竄均須確切查明妥籌堵剿金陵勢成檻穽其機大爲可乘應卽如何相機進擣及會商左宗棠李鴻章進攻蘇杭使賊應接不暇以圖進取之處曾國藩等諒必成竹在胸惟窮寇必思鋌走江路水陸寬廣備禦宜嚴裏下河一帶尤應嚴密設防吳全美所領師船擊賊於江陰之黃田港能否卽與

由滬派出進攻江陰各軍會合攻擣著曾國藩都興阿等於南北兩岸分飭各軍乘機妥辦通州所辦投賊齋匪如果僅係食齋茹素自不得濫行屠戮據都興阿等奏該地方官已率行正法富明阿見在下游靖江一帶察看情形自應訪查確實並著吳棠飭令喬松年及各地方確切查明詳慎辦理毋許輕重失宜致有激變情事渡江遷徙難民尤當妥爲安撫毋令失所而游匪溷迹亦不得不嚴加防範都興阿所患舊疾前經具奏諒係實情此時富明阿既赴下游揚營堵剿正當喫緊何可遽爾卸肩都興阿著俟富明阿回營後賞假一月在營調理候旨遵行刻下軍務正在得手該將軍雖在營養病仍當督率所部各軍嚴密防剿毋稍鬆勁淮甸苗逆鴟張唐訓方前奏軍持五日之糧而蒙邑被賊圍攻尤爲厄緊旬日以來未據該撫續報情形殊深廛系本日吳棠片奏姚

廣武等軍偪攻韓村及援應英翰邊賊戴溝童亭等處情形著卽嚴飭該總兵及副將艾憲銀等聯合皖軍扼守要隘實力進剿並著探明臨淮近日軍情及蒙城戰守之狀與唐訓方聯絡策應唐訓方是否驛路阻隔致稽奏報一切情形著吳棠隨時詳悉馳奏將此由六百里各諭令知之○諭張之萬等奏永亳捻匪餘燼復熾東防喫重移兵扼紫並南路攻剿情形一摺永亳賊匪蜂起捻首蘇老夢等糾眾攻撲盧廟等集楚捻回據雉河李大箇子等攻擾永城之丹城集等處苗逆遣黨到處煽惑渦河南北徧地匪蹤該省東防喫重亟應添集兵力以資堵剿著張之萬毛昶熙卽飭駐防北路之李世玉帶領所部各軍並將添募壯勇迅速成軍卽日拔隊東行馳赴永城扼要駐紮相機前進務當以剿爲防毋得株守一隅徒事遷延張岡見已四面合圍斷賊汲道攻剿正在喫

緊且南路之賊渡淮竄入息境有圖援張岡之信此時豫軍以全力圍攻該處自未能兼顧東路致令功廢半途惟歸陳一帶防務緊要張之萬等惟當督飭各軍速將張岡攻克以便移軍東路迅掃逆氛毋得曠日持久因張岡一處牽掣大軍致誤全局顧嘉蘅前據該撫奏稱代理南陽府知府近日是否業已交卸該員官聲政績如何及一切公事是否均能實心辦理並著張之萬詳查具奏將此由六百里諭令知之尋奏遵查顧嘉蘅歷任南陽任內著有循聲此次辦理團練亦屬認真報聞○諭多隆阿奏官軍分路進逼賊巢獲勝並趕造浮橋以利師行等摺片多隆阿分部各軍由渭河南北進發渭南各軍節次擊賊痛加勦洗已將零口等處之賊驅過戲河官軍移營前進見距臨潼僅十餘里渭北各營亦已進紮交口所辦甚屬妥協所有臨潼西北尙有三府里等處回

巢著卽督飭諸軍節節進剿並飭交口各營穩紮固守以俟南岸肅清卽行合軍北岸以剿清河迤西賊營並將曹克忠之軍移紮咸陽以防賊之西竄一俟礮船悉數造成上下梭巡賊匪不得偷渡往來剿辦更必得手臨潼一帶疏通多隆阿之軍與省城聯合並可兼顧西路雷正綰卽可迅速馳救鳳岐務令陝省逆回不得肆意西趨爲害甘省甘省平涼等處危急熙麟所部兵單將寡馬德昭一軍仍當懷遵疊次前諭飭令赴甘以資得力多隆阿與西安聲息旣通馬德昭之軍卽不至爲省城牽畱其地方官吏於轉運等項有敢不竭力辦理意存玩視卽着多隆阿據實嚴參咨行地方大吏立卽撤辦毋稍瞻顧多隆阿自陳病未輕減務須加意調理並將各營患疫士卒妥爲拊循將此由六百里諭令知之○諭多隆阿奏漢中情形緊要非謀勇兼備之將未能有裨李雲麟

前在安徽軍營曾隸該大臣部下心浮膽怯言大而夸其性情才
其實非將將之才以之遽膺統帥深恐因而債事等語與駱秉章
官文嚴樹森前後所奏大相歧異李雲麟疊經官文嚴樹森厯次
保奏堪膺統帥駱秉章亦謂李雲麟可以獨當一面自應確有見
聞惟茲據多隆阿奏稱李雲麟曾隸該將軍麾下所奏必非無因
誠恐其才或僅任偏裨未必能勝督辦之任見在漢中一帶粵逆
川匪勾結蔓延多隆阿由渭河南北兩岸進剿勢難兼顧若統兵
調度不得將才糜餉老師必致復蹈毛震壽故轍關繫甚非淺鮮
著官文駱秉章嚴樹森迅將李雲麟性情才具若何究竟是否堪
膺統帥迅卽切實馳奏無得以保奏在先稍涉含混儻該員將來
辦理漢南軍務或致貽誤事機必惟該督等是問如李雲麟曾經
親厯行間著有成效仍應據實奏聞亦不必因多隆阿此奏稍涉

遷就也原片著鈔給閱看將此由六百里各密諭知之○諭晏端書黃贊湯奏高州及肇羅等處軍務並勦辦廣海客匪情形一摺廣東巨逆陳金缸久踞信宜分布黨與東西奔突加以各處客匪煽動以致高州及肇慶羅定所屬均遭蹂躪茲據所奏分竄陽春電白羅定陽江等處之賊均有另股及客匪相爲勾結逆氛日肆蔓延勦辦殊未得手崑壽前往高州督辦此時應已抵高著卽審度機宜督率諸軍實力勦辦前諭毛鴻賓等以道員唐啟蔭曾歷戎行可卽派往高州會同崑壽籌辦勦匪事宜仍著該督撫等迅即飭令唐啟蔭速赴高州軍營幫同崑壽辦理並著崑壽於該員到營後與之悉心妥籌一切進勦機宜以資得力吳昌壽勦辦新甯廣海客匪尙未能破入寨城仍著飭令該司督率副將衛佐邦等軍速攻城賊痛殄逆氛毋任久踞毛鴻賓何日度嶺可抵新任

迅速奏聞未到以前晏端書於地方軍務不得以交卸在卽稍存
膜視高州等屬之賊方熾崑壽以本省提督統兵勦辦尤屬責無
旁貸黃贊湯履任後於粵省情形自己洞悉該督撫等均有地方
之責務須一切實力講求冀安疆圉以副委任將此由六百里各
諭令知之○癸酉河南永亳捻匪復熾諭張之萬等集兵防勦